

JOÃO TỸ ËG TỸ NÉN VENH KE MŨ RÁ

1 ¹Topê vỹ Jesus Cristo mỹ nén (ũ) tỹ hên ri ke ven, ãg tỹ kãnhmar nén venh ke mũ ti, kỹ Jesus vỹ ãg mỹ ven, ãg tỹ tỹ ti camarada nỹtĩn kỹ. Kỹ tóg ã tỹ jẽnẽ jafã jẽnẽ, ti tỹ ti camarada tỹ João mỹ tó jé gé. ²Ve kãn ja ti nĩ, João ti, Topê tỹ ti mỹ nén ven mũ ti, Jesus Cristo tỹ ti mỹ nén ven mũ ti ke gé. Ti tỹ ve kỹ tóg rãn ja nĩ, João ti, hã vỹ nĩ. ³Û tỹ vãnh rá tag to ke mũ ag mỹ tóg vĩ há han ke mũ, Topê ti, ù tỹ vãnh vĩ tag mẽg mũ ag mỹ ke gé. Topê tỹ tó mũn hã vẽ, ãg tỹ ti vĩ ki króm jé. Kãnhmar ãg tóg tag ki rãn kỹ nĩ tag ve kãn ke mũ, kakó tãvĩ tóg tĩ ha.

João tỹ ãmã tỹ 7 (ke) tá Jesus mré ke ag mỹ ti vĩ tó

⁴João tỹ rá hã vẽ. Isỹ ga tỹ Ásia tá Jesus mré ke ag mỹ rãn hã vẽ, cidade tỹ 7 (ke) ki ke ag mỹ.

Topê jé ãjag tỹ tar' hé, kỹ ãjag jé krĩ kãnhvy nỹtĩ. Topê vỹ nĩgtĩ. Vãšỹ tóg nĩ ja nĩgtĩ, kỹ tóg ùri nĩ nĩ, hã ra tóg kãtĩg ke mũ gé. Ti kuprĩg vỹ ti mré nĩ gé, kỹ tóg tỹ ù tỹ 7 (ke) ve nĩ, ti kuprĩg ti. Topê nĩgja tá tóg nỹtĩ, ti kuprĩg tỹ tỹ ù tỹ 7 (ke) ve ãn ti. Ti kuprĩg ãn jé Topê mré ãjag krĩ tỹ kãnhvy' hé, ⁵Jesus Cristo mré ke gé. Jesus vỹ Topê vĩ tó há han ja nĩgtĩ, to tóg krónh ke ja tũ nĩgtĩ. Kỹ tóg ã ter kar kỹ rĩr mãn vén ja nĩ. Kỹ ãg rĩnrĩr mãn ke mũ gé, ti nón. Kỹ Jesus tóg ãprã pã'i ag kri tỹ ùn mág jé gé.

Ëg to há tãvĩ ti nĩ, Cristo ti. Ti kyvánh tóg ãg jagfy ti ki kãkutẽ, tỹ tóg ãg krenkren han, ãg tỹ Topê vỹ mranh ja to. ⁶Kỹ tóg ãg tỹ pã'i han ke mũ gé, ti krẽm. Topê tũ ki rĩr jé ãg tóg ke mũ gé, ti jóg tũ ki. Ti hã ne ã pir mỹ tỹ ùn mág nĩ', Jesus ti. Ti hã ne ã pir mỹ tar nĩ', ùri, kỹ tóg tũ' henh ke tũ nĩ, ti tar nĩn kỹ. Hã vẽ.

⁷Ha vé, kãtĩg mãn jé tóg ke mũ, kãnhkã góg kãmĩ. Vãnh kar vỹ ti venh ke mũ, ãn kã, ù tỹ ti kusón mũ ag mré hã. Kỹ povo kar vỹ ti tugrĩn jagtar kãn ke mũ. Jagtar jé ag tóg ke mũ, vỹšỹrẽnh jé ag tóg ke mũ, ha vemnĩ. Hã vẽ.

⁸“Ûn ve vỹ tỹ inh nĩ, hã ra sóg tỹ ãgno nĩnh ke mũ gé,” he tóg, ãg pã'i mág ti. Vãšỹ tóg nĩgtĩ, kỹ tóg ver ùri nĩ gé, kỹ tóg kãtĩg ke mũ gé, ù tỹ nén (ũ) kar han ki kanhrãn mũ ãn ti.

João tỹ Jesus ve

⁹Ājag mré ke vỹ tỹ inh nĩ, inh, hã vỹ: João, he mũ. Jesus mré ke vỹ tỹ inh nĩ, ājag mré. Jagtar inh nĩ gé, ājag jagāgtar ri ke inh nĩ gé, hã ra sóg ājag kóm to krónh ke tũ nĩgtĩ gé, kỹ sóg ājag mré Topē tỹ tỹ ěg pãĩ nĩ venh ke mũ gé. Goj vãso tá inh nĩ nĩ, ti jyjyn hã vỹ: Patmos, he mũ. Ki sóg se kỹ nĩ nĩ, isỹ Topē vĩ tó ja tugrĩn. Jesus vỹ ěg mỹ ki hã tó ja nĩ. Ti vĩ ěn tó ja inh nĩ, vĕnh kar mỹ, hã tugrĩn isóg se kỹ jĕ.

¹⁰Domingo ũ kã Topē kuprĩg tóg inh mỹ nĕn nĕ ven. Inh pãnĩ tá sóg jamã hár(a) vĕnh vĩ mĕ, kỹ tóg trombeta kyr mĕ ja nĩ, vĕnh vĩ ěn ti. ¹¹Kỹ tóg inh mỹ: “rán nĩ, ģ tỹ nĕn vĕg mũ tag ti,” he ja nĩ. “Livro ki rán nĩ. Inh mré ke ag mỹ livro tag jĕnĕmnĩ, cidade tỹ Ēfeso ra, cidade tỹ Esmirna ra, cidade tỹ Pĕrgamo ra, cidade tỹ Tiatira ra, cidade tỹ Sardes ra, cidade tỹ Filadĕlfia ra, cidade tỹ Laodicĕia ra ke gé,” he ja tóg nĩ, inh pãnĩ tá inh mỹ vĕnh vĩ tó mũ ěn ti.

¹²Kỹ sóg vĕsỹjãm ěvãnh, sỹ ũ tỹ inh mré vĩ mũ ěn ve jĕ. Isỹ vĕsỹjãm ěvãnh kỹ sóg nĕj tỹ kri vin jafã tỹ 7 (ke) vé, vela tỹ kri vin jafã ěn, ouro tỹ tóg hyn han kỹ nỹtĩ. ¹³Nĕj tỹ kri vin jafã ag kjuu kã ũ tóg jĕ nĩ, hã ra tóg tỹ ěprã ke nĩ ve nĩ. Kur tĕj tu kỹ tóg jĕ nĩ, ouro tỹ tóg vĕsóg fĩn kỹ jĕ nĩ gé, ti fe kri, ũ tỹ tỹ ěprã ke nĩ ve ěn ti. ¹⁴Gãnh kupri pĕ tóg jĕ, vĕnh mĕg tỹ carneiro kyki kupri ri ke tóg nĩ, ti gãnh ti, kukryr kó ri ke. Kanĕ gru tóg jĕ nĩ, pĩ gru ri ke. ¹⁵Pĕn jĕngrĕ tóg jĕ nĩ, ouro jĕngrĕ ri ke. Ēg tỹ pĩ ki ouro vãm kỹ ti tỹ jonh ke kỹ jĕngrĕ sĩnvĩ han ěn ri ke ti nĩ, ti pĕn ti. Ti vĩ vỹ goj krog tỹ óóh he ěn ri ke nĩ. ¹⁶Krĩg tỹ 7 (ke) génh kỹ tóg jĕ nĩ. Ā pĕgja tỹ tóg krĩg tỹ 7 (ke) génh kỹ jĕ nĩ. Kỹ rógro jã vỹ ti jĕnkã tá kãkutĕ mũ. Jã rĕgre ti nĩ, rógro ti, jã há. Ti kakã vỹ kókov nĩ, rã tỹ ěg nĩno kã sa kỹ kókov ěn ri ke ti nĩ, ũ tỹ tỹ ěprã ke nĩ ve ěn kakã ti.

¹⁷Sỹ ti ve kỹ sóg ti pĕn krĕm kutĕ mũ, ga kri. Ter ve han inh. Hã ra tóg ģ pĕgja tỹ inh mĕg mũ, kỹ tóg inh mỹ: “inh kamĕg tũg nĩ,” he mũ. “Ũn ve vỹ tỹ inh nĩ, ěgno ke gé. ¹⁸Rĩr inh jĕ nĩ. Ter ja inh nĩ, hã ra sóg rĩr jĕ nĩ, kỹ sóg ter mãn ke tũ pĕ nĩ. Isỹ ũ mỹ: “ter jĕ ģ tóg ke mũ,” hen kỹ tóg ter ke mũ. Isỹ ũ mỹ: “ter ke tũ ģ tóg nĩ,” hen kỹ tóg ter ke tũ nĩ gé, kỹ tóg vĕser jamã venh ke tũ nĩ gé,” he tóg. ¹⁹“Rán nĩ, ģ tỹ nĕn vĕg mũ tag ti, ěprã ke ag tỹ ũri nĕn vĕg mũ ti, ag tỹ kar kỹ nĕn venh ke mũ ti ke gé,” he tóg. ²⁰“Krĩg ag vĕg ģ tóg jĕ nĩ, inh nĩgé kãki. Kỹ ģ tóg nĕj tỹ kri vin jafã ag vĕg mũ gé, ouro tỹ vela tỹ kri vin jafã tỹ 7 (ke) tag ag. Nhỹ ģ mỹ kãmĕn, ģ tỹ nĕn vĕg mũ tag ti. Krĩg tỹ 7 (ke) tag ri ke ag nỹtĩ, Topē tỹ jĕgnĕ jafã ag. Inh ki ge kỹ nỹtĩ ag ki ag tóg rĩr tũ, Topē tỹ jĕgnĕ jafã tag ag. Sỹ ģ mỹ cidade tỹ 7 (ke) tó mũ ěn tá ag nỹtĩ, inh mré ke ag, ag tỹ ũn ki rĩr mũ ag. Kar kỹ nĕj tỹ kri vin jafã ri ke ti nỹtĩ, ũ tỹ inh ki ge kỹ nỹtĩ tag ag,” he tóg, ũ tỹ tỹ ěprã ke nĩ ve ěn ti.

Jesus tỹ Ēfeso tá igreja tá ke ag mỹ ģ vĩ jĕnĕ

2 ¹“Ũ tỹ cidade tỹ Ēfeso tá inh mré ke ag ki rĩr mũ ěn mỹ tag rán nĩ, ha mĕ,” he tóg, ũ tỹ tỹ ěprã ke nĩ ve ěn ti. “Ũ tỹ ģ mỹ vĕnh vĩ jĕnĕg mũ vỹ krĩg tỹ 7 (ke) génh kỹ jĕ nĩ, ti pĕgja tá ti nĩgé kãki, hemnĩ. Kỹ tóg nĕj tỹ kri

vin jafā t̄y 7 (ke) kāmī tī mū gé, hemnī. ²Ājag t̄y nén han mū ki kanhró sóg nī, he ti, hemnī iso. Vāsān ājag tóg tī. Iso krónh ke tū ājag tóg n̄tī. Ūn jykre pāno ag tóg ājag m̄y kórég n̄tī. Ājag kāmī ū tóg ón k̄y: apóstolo v̄y t̄y ěg n̄tī, he ja n̄tī. Ag jykre tugn̄m k̄y ājag tóg ag ón mū tag to ag pan. ³Iso tar ājag tóg n̄tī. Isugrīn ājag tóg jagtar, ge ra ājag tóg iso krónh ke ja tū nī.

⁴Hā ra sóg nén ū sī tó sór mū, ājag m̄y. Ājag t̄y nén han mū ū tóg inh m̄y há tū nī. Ājag t̄y inh ki ge vén k̄y ājag tóg iso há tāvī n̄tī ja n̄gtī, k̄y tóg há tī ja nī, hā ra ājag tóg ūri krónh ke mū. ⁵Ājag t̄y vās̄y iso tar ěn mī ěkrén nī. Ājag jykre kórég tovānh nī. Ājag t̄y inh ki ge vén ěn ri ke han mān nī, iso há tāvī n̄tī mān nī. Ājag t̄y tag han sór tū n̄tīn k̄y sóg ājag ki jun k̄y (sóg) ājag t̄y néj t̄y kri vin jafā ěn ma t̄ig ke mū, ha vemnī.

⁶Nén ū tóg hā ra há nī, ājag t̄y nén han mū ū ti. Nicolaítas he mū ěn ag jykre to ājag tóg kórég tāvī n̄tī, is̄y ag jykre to kórég kóm, he tóg, hemnī, Ēfeso tá ke ag m̄y, vĕnh rán ki,” he tóg inh m̄y, ū t̄y t̄y ěprā ke nī ve ěn ti.

⁷“Ū n̄grĕg n̄tī ag t̄y t̄y jĕmĕ jĕ, Topĕ kuprīg vī ti. Ū t̄y inh ki ge k̄y n̄tī ag hā m̄y tóg tó tī, Topĕ kuprīg ti,” he tóg. “Ū t̄y isovānh tū ěn v̄y ka kanĕ há konh ke mū, ka t̄y ěg rīnrīr han mū ěn kanĕ, Topĕ jakrĕ ěn kanĕ,” he tóg, ū t̄y t̄y ěprā ke nī ve ěn ti. Ti t̄y Ēfeso tá ke ag m̄y vĕnh vī jĕnĕg mūn hā vĕ.

Jesus t̄y Esmirna tá igreja tá ke ag m̄y ā vī jĕnĕ

⁸K̄y tóg: “ū t̄y cidade t̄y Esmirna tá inh ki ge k̄y n̄tī ag ki rīr mū ěn m̄y tag rán nī, ha mĕ,” he mū gé, ū t̄y t̄y ěprā ke nī ve ěn ti. “Ū t̄y ā m̄y vĕnh vī jĕnĕg mū v̄y t̄y ūn ve nī, hā ra tóg t̄y ěgno nī gé, hemnī. Ter ja ti nī, hā ra tóg rīr mān, hemnī iso. ⁹Isugrīn ag tóg ājag to kórég n̄tī, k̄y ājag tóg jagāgtar n̄tī. Ki kanhró sóg nī. Ge ra ājag tóg inhhā rico ri ke n̄tī. Ājag to ag tóg vī kónān tī, ū t̄y ón k̄y: “Judeu v̄y t̄y ěg n̄tī, Topĕ tū v̄y t̄y ěg n̄tī,” he mū ag. Ag pi(jĕ) t̄y Topĕ tū n̄tī! Satanás tū v̄y t̄y ag n̄tī. ¹⁰Ājag jagtar han jĕ ag tóg ke mū, isugrīn. Mūmĕg tūg nī hā ra. Japo v̄y ājag kato vāsān ke mū, k̄y ag tóg vĕseja kātā ājag vām ke mū. Japo t̄y ājag jykre ve sór hā vĕ. Kurā t̄y 10 (ke) ki ke vĕ, ag t̄y ājag vóg kónān ke ti. Isovānh tūg nī, ag t̄y ājag tén sór mū ra. K̄y ājag tóg rīr kr̄yg (ja) tū venh ke mū, k̄y tóg ājag m̄y sér t̄inh mū, he tóg, hemnī, vĕnh rán ki,” he tóg, ū t̄y t̄y ěprā ke nī ve ěn ti, inh m̄y.

¹¹“Ū n̄grĕg n̄tī ag t̄y t̄y jĕmĕ jĕ, Topĕ kuprīg vī ti. Ū t̄y inh ki ge k̄y n̄tī ag hā m̄y tóg tó tī, Topĕ kuprīg ti,” he tóg. “Ū t̄y isovānh tū ěn v̄y nūgme ki vár ke tū nī,” he tóg, ū t̄y t̄y ěprā ke nī ve ěn ti. Ti t̄y Esmirna tá ke ag m̄y vĕnh vī jĕnĕg mūn hā vĕ.

Jesus t̄y Pérgamo tá igreja tá ke ag m̄y ā vī jĕnĕ

¹²K̄y tóg: “ū t̄y cidade t̄y Pérgamo tá inh ki ge k̄y n̄tī ag ki rīr mū ěn m̄y tag rán nī, ha mĕ,” he mū gé, ū t̄y t̄y ěprā ke nī ve ěn ti. “Ū t̄y ā m̄y vĕnh vī jĕnĕg mū v̄y rógro jā régre vyn k̄y jĕ nī, ūn jā há ěn, hemnī iso. ¹³Satanás n̄gja tá ājag tóg ěmā n̄tī, ki kanhró sóg nī. Iso tar ājag tóg n̄tī. Ājag

régre tỹ Antipas tén ja ag tóg nĩ, ti tỹ inh jyjy tó tugrĩn. Ge ra ājag tóg iso: “ti ki kagtĩg sóg nĩ,” he ja tũ nĩ, ājag tỹ Satanás jamā tá nỹtĩ ra.

¹⁴Hā ra sóg nén ũ tó sór mũ gé, ājag mỹ, ti tỹ inh mỹ há tũ nĩn kỹ. Ājag kāmĩ ũ ag tóg Balaão jykre han sór mũ. Balaão vỹ Balaque mỹ kāmén ja nĩ, ti tỹ Israel krē ag krĩn kónān jé, Topē vĩ mranh ke to. Ti tỹ ag krĩn kónān kỹ ag tóg vènh kąggrá to festa ko ja nĩgtĩ. Ag tỹ ón kỹ vènh kąggrá to: topē, he mũ ěn mỹ festa ja vè. Ēn ko kỹ ag tóg ājag prũ tũ fag mré nỹgnỹ! he ja nĩgtĩ gé. Tag han sór ag tóg mũ gé, Balaão kóm, ājag kāmĩ ũ ag, kỹ tóg inh mỹ kórég nỹ. ¹⁵Kỹ ājag kāmĩ ũ ag tóg Nicolaítas he mũ ěn ag jykre han sór mũ gé. ¹⁶Tovānh nĩ, ājag jykre tag. Ke tũ nĩ mũ ra sóg ājag ki jun ke mũ, sỹ ũ tỹ vènh jykre tag han mũ ag kato vāsān jé, rógro tỹ inh jĕnkā tá kākutē mũ ěn tỹ, hemnĩ, vènh rán ki,” he tóg, inh mỹ, ũ tỹ tỹ ěprā ke nĩ ve ěn ti.

¹⁷“Ũ nĩgrĕg nỹtĩ ag tỹ tỹ jĕmĕ jé, Topē kuprĩg vĩ ti. Ũ tỹ inh ki ge kỹ nỹtĩ ag hā mỹ tóg tó tĩ, Topē kuprĩg ti,” he tóg.

“Ũ tỹ isovānh tũ mỹ sóg kanhkā tá vĕjĕn ěn nĩm ke mũ, vĕjĕn tỹ péju kỹ nĩ ěn. Ag mỹ sóg pó kupri nĩm ke mũ gé. Kri vènh jyjy tąg tóg rán kỹ nĩ. Ũ pi(jé) vènh jiji tag ki kanhró nĩnh mũ. Ũ tỹ pó kupri ěn mäg mũ ěn hā tóg ki kanhró nĩnh mũ, ā pir mỹ, ti jyjy tąg ki, he tóg, hemnĩ,” he tóg, ũ tỹ tỹ ěprā ke nĩ ve ěn ti. Ti tỹ cidade tỹ Pérغامo tá ke ag mỹ vènh vĩ jĕnĕg mũn hā vè.

Jesus tỹ Tiatira tá igreja tá ke ag mỹ ā vĩ jĕnĕ

¹⁸Kỹ tóg: “ũ tỹ cidade tỹ Tiatira tá inh ki ge kỹ nỹtĩ ag ki rĩr mũ ěn mỹ tag rán nĩ, ha mĕ,” he mũ gé, ũ tỹ tỹ ěprā ke nĩ ve ěn ti. “Ũ tỹ ā mỹ vènh vĩ jĕnĕg mũ vỹ tỹ Topē kósin nĩ, hemnĩ,” he tóg. “Ti kanĕ vỹ pĩ gru ri ke nĩ, ti pĕn vỹ ouro jĕngrĕ ri ke nĩ gé, hemnĩ iso. ¹⁹Ājag tỹ nén han mũ vég sóg tĩ. Iso há tāvĩ ājag tóg nỹtĩ, inh ki rā pĕ han kỹ ājag tóg nỹtĩ. Inh rānhrāj han ājag tóg mũgtĩ, to krónh ke tũ ājag tóg nĩgtĩ. Vāsỹ ājag tóg inh jykre to tar nỹtĩ ja nĩgtĩ, kỹ ājag tóg ũri to tar káfór nỹtĩ gé.

²⁰Hā ra sóg nén ũ sĩ tó sór mũ gé, ājag mỹ, ti tỹ inh mỹ há tũ nĩn kỹ. Jezabel fi vĩ kamĕg ja tũ ājag tóg nĩgtĩ, hā kỹ fi tóg ón kỹ vĩ tĩ nĩ. Inh camarada ag krĩn kónān fi tóg tĩ, ag tỹ fi mré nỹ jé, ag tỹ vènh kąggrá mỹ nén (ũ) nĩ pũn mũ ěn ko jé gé. ²¹Fi tovānh isóg mũ vĕ, fi tỹ ā jykre tugnỹm jé, hā ra fi tóg ā jykre kórég tovānh sór tũ nĩ. ²²Fi kagāg jé sóg ke mũ. Ũ tỹ fi jykre han mũ ag vóg kónān jé sóg ke mũ gé, ag tỹ fi jykre kórég tovānh jāvānh nỹtĩn kỹ. ²³Fi krē kagtén kán jé sóg ke mũ gé. Kỹ inh ki ge kỹ nỹtĩ kar ag vỹ inh jykre ki kanhró nỹtĩnh mũ. Vènh kar tỹ nén to jykrén mũ ěn ve kán sóg tĩ, vènh kar tỹ nén han sór mũ ěn ke gé. Ājag tỹ nén han mũ ěn ri ke han jé sóg ke mũ, ājag mỹ, ha vemnĩ.

²⁴Ājag kāmĩ ũ ag tóg hā ra fi jykre han ja tũ nĩgtĩ, ājag tỹ Tiatira tá nỹtĩ ra. Ājag pi(jé) fi tỹ vènh jykre han mũ han ja nĩ. Ag tỹ nén to: “Satanás jykre jagy,” he mũ ěn han sór ja tũ ājag nĩgtĩ. Hā kỹ sóg ājag mỹ nén ũ jagy tónh ke tũ nĩ gé. ²⁵Ājag tỹ nén han mũ to tar nỹtĩmnĩ, gen kỹ inh kātĩg mǎn ke tag jāvānh nỹtĩmnĩ.

²⁶Ũ tỹ isovãnh tũ ên ag tỹ sóg pã'i hyn han ke mũ, povo kar kri, ù tỹ inh vĩ ki króm mũ ag tỹ, ù tỹ iso krónh ke tũ ên ag tỹ ke gé. Inh panh vỹ isỹ pã'i han, hã kỹ sóg ãjag tỹ pã'i han ke mũ gé, inh kóm, ²⁷ãjag tỹ inh kóm tỹ povo kri pã'i nỹti jé. Kỹ ãjag tóg ag to vãsãn ke mũ, ferro tỹ ag mrãnmrãn kỹ, êg tỹ go'or tỹ kukrũ gãm mũ ên ri ke. ²⁸Tar ãjag tóg nỹtĩnh mũ, kỹ sóg ãjag mỹ krĩg mág nĩm ke mũ gé, he tóg, hemnĩ, ag mỹ, vènh rán ki," he tóg, ù tỹ tỹ êprã ke nĩ ve ên ti.

²⁹"Ũ nĩgrêg nỹti ag tỹ tỹ jêmê jé, Topê kuprĩg vĩ ti. Ũ tỹ inh ki ge kỹ nỹti ag hã mỹ tóg tó tĩ, Topê kuprĩg ti," he tóg, ù tỹ tỹ êprã ke nĩ ve ên ti. Ti tỹ cidade tỹ Tiatira tá ke ag mỹ vènh vỹ jênêg mũn hã vè.

Jesus tỹ Sardes tá igreja tá ke ag mỹ ã vỹ jênê

3 ¹Kỹ tóg: "ù tỹ cidade tỹ Sardes tá inh ki ge kỹ nỹti ag ki rĩr mũ ên mỹ tag rán nĩ, ha mẽ," he mũ gé. "Ũ tỹ ã mỹ vènh vỹ jênêg mũ vỹ Topê kuprĩg tỹ jagrê nĩ, ti kuprĩg tỹ 7 (ke) nĩ ve ên tỹ, kỹ tóg krĩg tỹ 7 (ke) mãn kỹ jê nĩ gé, hemnĩ iso," he tóg. "Ãjag tỹ nén han mũ ki kanhró sóg nĩ. Vènh kar vỹ ãjag to: "há ag nỹti, tar ag nỹti," he ti, hã ra ãjag tóg iso krónh ke ja nĩ, hã kỹ ãjag tóg ùn kãgter mũ ri ke nỹti. ²Nũr tovãnh nĩ, tar nỹtĩmĩ, ke tũ nĩ mũ ra ãjag kãgter pẽ han kãn ke mũ. ãjag jykre tugnỹm inh, hã ra tóg há tũ nĩ ver. Topê vỹ ãjag tỹ nén han mũ to há tũ nĩ ver. ³Vènh vỹ sér mẽ ãjag mỹr, kỹ to jykren há han nĩ. To tar nỹtĩmĩ, to vãsãn nĩ. ãjag nũgnũr kỹ sóg ãjag krĩg mỹ jun ke mũ, ù tỹ êg tỹ nén pēju(g) tĩ tỹ êg nũr krĩg mỹ jun mũ ri ke han jé sóg ke mũ. Inh jun ke kurã ki kagtiĩg ãjag tóg nỹti mỹr.

⁴Ãjag kãmĩ ù ag tóg hã ra vènh kavènh ja tũ nĩ, Sardes tá. Tag ag vỹ kur kupri ên rĩnh ke mũ, inh mré ag nỹtĩnh ke mũ. ⁵Ũ tỹ isovãnh tũ ên ag vỹ kur kupri ên rĩnh kãn ke mũ. Ag jygjy kykũnh ke tũ inh nĩ, inh livro ki. Ũn rĩnrĩr ke mũ ag jygji vỹ ki ránrán kỹ nỹti, inh livro ên ki. Ên ag jygjy tó jé sóg ke mũ, inh panh mỹ, ti tỹ jègnê jafã kar ag mỹ ke gé, he tóg, hemnĩ, vènh rán ki," he tóg, inh mỹ, ù tỹ tỹ êprã ke nĩ ve ên ti.

⁶"Ũ nĩgrêg nỹti ag tỹ tỹ jêmê jé, Topê kuprĩg vĩ ti. Ũ tỹ inh ki ge kỹ nỹti ag hã mỹ tóg tónh ke mũ, Topê kuprĩg ti," he tóg, ù tỹ tỹ êprã ke nĩ ve ên ti. Ti tỹ cidade tỹ Sardes tá ke ag mỹ vènh vỹ jênêg mũn hã vè.

Jesus tỹ Filadélfia tá igreja tá ke ag mỹ ã vỹ jênê

⁷Kỹ tóg: "ù tỹ cidade tỹ Filadélfia tá inh ki ge kỹ nỹti ag ki rĩr mũ ên mỹ tag rán nĩ, ha mẽ," he mũ gé. "Ũ tỹ ã mỹ vènh vỹ jênêg mũ vỹ tỹ ùn há pẽ nĩ, ùn tar tãvĩ, kỹ tóg ki hã tó tĩ, hemnĩ. Davi ên tỹ jãnkã róm jafã vyn kỹ tóg jê nĩ, jãnkã nón jafã ên ti, chave ên ti, hemnĩ. Ti tỹ jãnkã ù róm kỹ ù tóg nĩfènh mãn ke tũ nĩ, kỹ ti tỹ jãnkã ù nĩfènh kỹ ù tóg nón mãn ke tũ nĩ gé, hemnĩ, iso," he tóg. ⁸"Ãjag tỹ nén han mũ ki kanhró sóg nĩ. Tỹ nén mág tũ ãjag nỹti. Hã ra ãjag tóg isỹ ãjag mỹ nén tó mũ ên ki króm kỹ nỹtiĩg, isovãnh ja tũ ãjag tóg nĩgtĩ. ãjag mỹ sóg êg tỹ jãnkã róm tĩ ên ri ke han, kỹ ù tỹ ãjag jo nĩfènh ke tóg tũ tĩ. ⁹Ha mẽ, sỹ nén tónh ke ti. ãjag mỹ sóg ù ag jègnènh mũ, Satanás mré ke ù ag. Ôn kỹ ag tóg: "Judeu vỹ tỹ êg nỹti, Topê mré ke vỹ tỹ êg nỹti," henh ke mũ. Ag ón hã vè. Ag tỹ ke sór tũ

ra ag tóg ājag krēm mūg kenh ke mū, ājag mý: “ēg kāfór ājag tóg nýtí,” hen ký, ha vemní. Ājag to há tāví sóg nī. Hā ký ājag kato vāsānsān mū ag vỹ tag venh ke mū, ha vemní. ¹⁰Inh vī ki króm ājag tóg mū mýr, sý ājag mý: “isovānh tūg nī,” hen ký. Hā ký sóg ājag jy nīgān ke mū, ga kri ke kar ag tỹ nén ū jagy venh ke kurā ēn kā. Ti jagy tāví ve jé ag tóg ke mū, ēprā ke kar ēn ag, isỹ ag jykre tugnỹm ken ký. ¹¹Kānhmar inh kātīg ke mū. Ājag tỹ inh ki ge ký nýtí tag tovānh tūg nī, ke tū nī mū ra ū ag tóg ājag jēgja kā jē ký nén tỹ ājag mý sér tĩnh ke mū ēn venh ke mū inhhā. ¹²Ū tỹ isovānh tū ēn ag tỹ sóg ĩn nūna ri ke han ke mū, kanhkā tá, Topē jo ĩn ri ke ēn tá. Tá ag pa mǎn ke tū nýtí ha. Ag kri sóg Topē jiji rán ke mū gé, Topē jamā jyjy ti ke gé. Cidade tỹ Jerusalém tāg to ken hā vē. Kanhkā tá tóg kátérenh kenh ke mū, Topē tá, Jerusalém tāg tag ti. Kar ký sóg ag kri inh jiji tāg rán ke mū gé, he tóg, hemní, vēnh rán ki,” he tóg inh mý, ū tỹ tỹ ēprā ke nī ve ēn ti.

¹³“Ū nīgrēg nýtí ag tỹ tỹ jēmē jé, Topē kuprīg vī ti, ū tỹ inh ki ge ký nýtí ag hā mý tóg tónh ke mū, Topē kuprīg ti,” he tóg, ū tỹ tỹ ēprā ke nī ve ēn ti. Ti tỹ cidade tỹ Filadélfia tá ke ag mý vēnh vỹ jēnēg mūn hā vē.

Jesus tỹ Laodicéia tá igreja tá ke ag mý ā vī jēnē

¹⁴Ký tóg: “ū tỹ cidade tỹ Laodicéia tá inh ki ge ký nýtí ag ki rĩr mū ēn mý tag rán nī, ha mē,” he mū gé. “Ū tỹ ā mý vēnh vī jēnēg mū jyjyn hā vỹ: “ki hā tó mūn hā vē,” he mū, hemní,” he tóg. “Ki hā tóg tó tī, nén ū kar ki. Ōn vānh ti nīgtī, hemní. Ti hā tugrĩn Topē tóg nén (ū) kar han ja nīgtī, hemní iso,” he tóg. ¹⁵“Ājag tỹ nén han mū ki kanhró sóg nī. Ājag pi(jé) goj rỹ jagy ri ke nýtí!, ký ājag pi(jé) goj kusa ri ke nýtí gé! Ājag tỹ goj rỹ jagy ēn ri ke nýtí ran há tĩnh mū vē, ājag tỹ goj kusa ēn ri ke nýtí ran há tĩnh mū gé vē vē. ¹⁶Hā ra ājag tóg goj rỹ mē ri ke nýtí, ājag tỹ iso krój nýtĩn ký. Hā ký sóg ājag vām sór mū, ēg tỹ rērir tá goj rỹ mē ēn pra ký kujēn ēn ri ke han jé sóg ke mū, ājag tỹ, ha vemní. ¹⁷Vēso ājag tóg: “rico ēg nýtí, há ēg nýtí, nén ū tóg ēg mý tū! he tū pē nī,” he tī. Hā tū tó ājag tóg tī. Jagāgtar ājag tóg nýtí, mýr, ha mē. Tỹ nén tū ājag tóg nýtí, jykre kórég ājag tóg nýtí, kur tū ājag tóg nýtí, kyvó ājag tóg nýtí, ājag tỹ há nýtí ve ra. Hā ra ājag tóg ki kagtīg nýtí, ājag kórég nýtí tag ki. ¹⁸Hā ký sóg ājag mý: “inh ki mǎn kāmū jēg, ouro há ēn ti,” he sór mū, ājag tỹ rico nýtí jé. Kur kupri kajām nī, ājag tỹ kator nýtí tū nī jé, ājag mý’āg tū nī jé. Vēnh kagta kajām nī, ājag kanē mý, ājag tỹ ve há han mǎn jé. ¹⁹Isỹ ū to há nī ēn mý sóg vī tar han tī, ti kanhrān jé. Vēso jykren ký ājag jykre kórég togvānh nī. ²⁰Mē há han nī, sý ājag mý nén tó mū tag. Re tá inh jē nī, jānkā tá, ký sóg tỹ tórón! tórón! ke mū, tỹ tag! tag! ke sóg mū. Ū tỹ inh vī mēg mū mý tóg há tī, ký tóg inh mý nón ke mū, jānkā ti, ký sóg ti ĩn kāra rānh ke mū. Ký sóg ti mré jēn ke mū, ký tóg inh mré jēn ke mū gé, ha mē. ²¹Ū tỹ isovānh tū ēn mý sóg: “inh mré nī,” he sór mū, ký tóg inh ri ke tỹ ūn mág nĩnh ke mū. Inh panh mré sóg tỹ ūn mág nī ha, isỹ ti tovānh ja tū nĩn ký, ký tóg tá inh mré nĩnh ke mū gé, he tóg, hemní, vēnh rán ki,” he tóg, ū tỹ tỹ ēprā ke nī ve ēn ti.

22“Ũ nigrêg nýtí ag tý tý jêmê jé, Topê kuprîg ví ti, ù tý inh ki ge ký nýtí ag hã mý tóg tónh ke mũ, Topê kuprîg ti,” he tóg, ù tý tý êprä ke nĩ ve ên ti. Ti tý cidade tý Laodicéia tá ke ag mý vênh ví jênêg mún hã vê.

Ag tý kanhkã tá Topê mý ví há han

4 ¹Ký sóg kynhmý êvãnh, ký sóg kanhkã jãnkã vé, hã ra tóg róm ke ký jê nĩ. Ký sóg vênh ví ên jêmê mãn, vênh ví tý trombeta kyr ri ke ên, ký tóg inh mý: “ha kãtäpny,” he mũ. “Á mý sóg ven sór mũ, äjag tý kar ký nén venh ke mũ ti,” he tóg, vênh ví ti.

²Ký vãhã Topê kuprîg tóg inh krĩn mũ, ký sóg nén nèn vég mũ. Kanhkã tá tóg nĩgja sĩnvĩ jê nĩ, ký ù tóg kri nĩ nĩ. ³Ti kakã tóg jêngrê nĩ, pó sĩnvĩ jêngrê ên ri ke, pó tý jaspe jêngrê ên ri ke, pó tý sardônio jêngrê ên ri ke. Nĩgja sĩnvĩ ên vỹ ta no ri ke nĩ, ký tóg jêngrê jê gé, ta no ên ti, pó tý esmeralda jêngrê ên ri ke. ⁴Nĩgja sĩnvĩ ên pênĩn nĩgja sĩnvĩ ù tóg nýtí gé, ù tý 24 (ke) ti nýtí. Nĩgja ên kri kófa ag tóg nĩgnĩ ký nýtí, kófa tý 24 (ke) ag. Kur kupri rĩnh ký ag tóg nýtí, ouro tý krĩ tógfĩ rĩnh ký ag tóg nýtí gé. ⁵Nĩgja sĩnvĩ ên tá ta tý kómkóm ke ri ke ên tóg vênh ven mũ, ký ta tý týrỹr he ri ke ên tóg mẽ há tí gé, vênh ví ke gé. Ti jo pĩ jónhkó gru tý 7 (ke) tóg nýtí gé. Topê kuprîg to ken hã vê, ù tý 7 (ke) nĩ ve ên, hã vỹ: pí jónhkó gru tý 7 (ke), he mũ. ⁶Nĩgja sĩnvĩ kakãm nén ù tóg nỹ nĩ, ký tóg vidro tý goj nĩ ve nĩ, goj jãpri, goj kókov (pê).

Ký nĩgja sĩnvĩ ên pênĩn ù ag tóg nýtí, ù tý 4 (ke) ag, ùn kanê e täví ag. Ag kakã ki ag tóg kanê e nýtí, kar ký ag pãní tá ke gé. ⁷Ag kãmĩ ù tóg mĩg ve ri ke nĩ, ký ù tóg monh tãg ve ri ke nĩ gé, ký ù tóg êg kakã ve ri ke nĩ, jãvo ù tóg kónhkó mág tẽ tí ve ri ke nĩ. ⁸Ag kar vỹ fêr tý 6 (ke) nýtí. Ký ag tóg äjag fêr ki kanê e nýtí gé, fêr ven ja tá, ti kãtã ke gé. Kurã kar ki ag tóg jãn tí, kuty kar ki ke gé, jãn to krónh ke jãvãnh ag tóg nýtí. Ag jãn hã vê, ha mẽ: “ùn mág! mág! mág! vỹ tý ti nĩ, êg jóg tý Topê ti, ù tý nén kar han ki kanhró nĩ ên ti. Vãsỹ tóg nĩ ja nĩgtĩ, ký tóg ùri nĩ gé, jãvo tóg kãtĩg ke mũ gé,” he ag tóg tí, jãn ký, nén nê tý 4 (ke) ên ag. ⁹Gen ký ag tóg Topê mý jãn tí, ti tý tý ùn mág nĩ ên hã tý ag tóg jãn tí. Ti mý ví há han ag tóg tí. Ti mý ag tóg: “nén kar hyn han há ã tóg nĩ,” he tí. Ũ tý nĩgja sĩnvĩ ên kri nĩ mũ mý ag tóg jãn tí, ùn rĩr nĩ ên mý. Ti rĩr nĩ vỹ tũg! henh ke tú pẽ nĩ. ¹⁰Ag tý ti mý jãn ký kófa tý 24 (ke) ên ag vỹ mũgmũg ke tí, ù tý nĩgja sĩnvĩ kri nĩ ên krêm. Mũgmũg ken ký ag tog ti mý: “Topê vỹ tý ã nĩ,” he tí, ùn rĩr nĩ ên mý. Ti rĩr nĩ vỹ tũg! henh ke tú pẽ nĩ. Ký ag tóg äjag krĩ tógfĩ ên vin tí, nĩgja sĩnvĩ ên krêm. ¹¹Ti mý ag tóg tag tó tí, ha mẽ: “êg Senhor vỹ tý ã nĩ, Topê vỹ tý ã nĩ. Nén ù kar hyn han ja ã nĩgtĩ. To jykrén ký ã tóg nén ù kar hyn han ja nĩgtĩ, hã ký tóg ki nýtí, ã tý nén hyn han mũ kar ên ti. Á hã ne ã pir mý tá krỹg he mũ! ký vênh kar vỹ ã mý ví há han ke mũ, ã to: “ùn mág vỹ tý ti nĩ,” hen ký, ký ag tóg ã ví ki króm tí gé,” he ag tóg tí, kófa ag, ù tý nĩgja sĩnvĩ kri nĩ ên mý.

Jesus t̃y livro m̃an

5 ¹K̃y sóg livro vég m̃u, livro ên ṽy gr̃in k̃y ñy. Û t̃y ñigja s̃inṽi kri ñi ên ṽy livro ên m̃an k̃y ñi ñi, ti p̃egja t̃y. K̃atá tóg rán k̃y ñi, ti ven ja tá ke gé. Tógf̃in k̃y tóg ñi ñi, livro ti. Tógf̃in ja t̃y 7 (ke) tóg ñi. Ti tógf̃in kri tóg go'or ñi gé, ù t̃y kygṽag t̃u ñi jé. ²K̃y sóg Topê t̃y jênê jaf̃a éhé tâvi vég m̃u gé. Ṽi tóg m̃u, jam̃a hár(a), k̃y tóg: “ù ñy h̃yn tá kr̃yg m̃u, ti tógf̃in kaṽan ti jé?” he m̃u.

³Hã ra ag tóg ù t̃y tá kr̃yg m̃u vég t̃u ñi, kanhk̃á tá, êpr̃a, ṽenh kupr̃ig ag k̃am̃i ke gé. K̃y ù t̃y livro kaṽan ke tóg t̃u t̃i, ti rá ve jé. ⁴K̃y sóg f̃y m̃u. Inh m̃y tóg e t̃i, ù t̃y livro kaṽan ke t̃u t̃in k̃y, êg t̃y ti rá ven jé. ⁵K̃y kófa ag k̃a ù tóg inh m̃y: “f̃y t̃ug ra,” he m̃u. “Povo t̃y Judeu k̃am̃i ùn pir tóg mig tar ri ke ñi, Davi kr̃ê'kr̃ê ag k̃a ùn pir ên ṽy tóg ṽenh kar t̃y h̃en ri ke ja ñi. Ên ṽy ti tógf̃in t̃y 7 (ke) ên kygṽan ki kanhr̃ó ñi, k̃y tóg livro ki rá ên venh ke m̃u,” he tóg inh m̃y, kófa ti.

⁶K̃y sóg ñigja s̃inṽi ên jo cordeiro vég m̃u, mé kr̃ê ên ti. Nén nê t̃y 4 (ke) ag ṽy ti p̃énin ñyt̃i, kófa ag ke gé, cordeiro ên p̃énin ag ñyt̃i. K̃y tóg t̃y ag t̃y t̃anh k̃y r̃ir m̃an ên ri ke jê. Ñika t̃y 7 (ke) ti ñi, kanê t̃y 7 (ke) ke gé, cordeiro ên ti. Topê kupr̃ig to ken h̃a ṽe, ù t̃y 7 (ke) ñi ve ên ti, h̃a ṽy: ñika t̃y 7 (ke) mr̃é kanê t̃y 7 (ke), he m̃u. Topê ṽy ti jênê ja ñi, ti t̃y ga kar m̃i t̃ig jé, Topê kupr̃ig ti. ⁷K̃y cordeiro ên ṽy ù t̃y ñigja s̃inṽi kri ñi ên tá jun m̃u, k̃y tóg ti ki livro ên m̃ag m̃u, ù t̃y ã p̃egja t̃y livro m̃an k̃y ñi ên ti ki. ⁸K̃y nén nê t̃y 4 (ke) ên ag ṽy m̃ügm̃üg ke k̃an m̃u, kófa t̃y 24 (ke) ag ke gé, cordeiro ên kr̃em ag tóg m̃ügm̃üg ke k̃an m̃u sir. Kófa ag ṽy ṽäkyn jaf̃a t̃y harpa génh k̃y ñyt̃i. Pénky t̃y ouro génh k̃y ag ñyt̃i gé. Pénky ên k̃aki tóg fór ñi, ti p̃un k̃y ger há han jaf̃a ên t̃y, h̃a ṽy: êg t̃y Topê mr̃é ṽémén t̃i, he m̃u. ⁹Cordeiro ên m̃y ag tóg j̃an m̃u, Jesus jé tag tó ag tóg m̃u, ha m̃e. “Á h̃a ne tá kr̃yg m̃u!” he ag tóg m̃u. “Á h̃a ne livro m̃an k̃y ti tógf̃i kygṽag m̃u ha! Á tén ja ag tóg, k̃y ã tóg ter k̃y êpr̃a ke ag kygṽam, Topê m̃y, p̃ã'i ag kar kr̃em ke ag k̃am̃i, ṽenh ṽi kar tó t̃i ag k̃am̃i, naç̃ao kar ag k̃am̃i, povo kar ag k̃am̃i ã tóg ù ag kygṽam ja ñigt̃i. ¹⁰Á t̃y ùn kygṽam m̃u ag m̃y ã tóg ṽenh r̃anhr̃aj ñim ja ñi gé, ag t̃y ã m̃y ã t̃u ki r̃ir jé, ag t̃y t̃y Topê camarada ñyt̃i jé. K̃y ag tóg êpr̃a ke ag kr̃ig m̃y t̃y ùn m̃ag ñyt̃inh m̃u,” he ag tóg, kófa ag, j̃anj̃an k̃y.

¹¹K̃y sóg Topê t̃y j̃egnê jaf̃a t̃y h̃en ri ke vég m̃u gé, mil t̃y mil t̃y h̃en ri ke. Ag e tâvin ra êg tóg ag nigkr̃én ke t̃u ñi. Ñigja s̃inṽi ên jo ag tóg ñyt̃i, nén nê t̃y 4 (ke) ên mr̃é, kófa ag mr̃é ke gé. ¹²J̃anj̃an k̃an ag tóg m̃u gé, jam̃a hár(a), k̃y ag tóg: “cordeiro tag tén ja ag tóg ñi, h̃a k̃y tóg ùri t̃y ùn m̃ag jé,” he m̃u. “T̃y tóg ṽenh kar kri ke jê ha, rico tóg jê ha, ki kanhr̃ó tóg jê ha, tar tóg jê ha, t̃y tóg ùn m̃ag jê ha, s̃inṽi tóg jê ha, ṽenh kar ṽy ti m̃y ṽi há han m̃u ha,” he ag tóg, Topê t̃y j̃egnê jaf̃a ag.

¹³K̃y ṽah̃a kanhk̃á t̃an kar ag ṽy j̃anj̃an m̃u, êpr̃a ke kar ag ke gé, ṽenh kupr̃ig kar ag ke gé, goj ki ke kar ag ke gé. Ag kar ṽy j̃anj̃an m̃u ha, jam̃a hár(a), k̃y ag tóg: “ù t̃y ñigja s̃inṽi kri ñi m̃u ên m̃y êg tóg ṽi há han ke m̃u ha, cordeiro ên m̃y ke gé,” he m̃u. “Ájag pir m̃y ag tóg t̃y ùn m̃ag ñyt̃i, ãjag pir m̃y ag tóg s̃inṽi ñyt̃i, ṽenh kar kri ke ṽy t̃y ag ñyt̃i, k̃y ag tóg t̃ug' h̃en ke t̃u p̃ê ñi,” he ag tóg m̃u sir, ṽenh kar p̃ê ti.

¹⁴Kỹ nén nê tỹ 4 (ke) ên ag vỹ tóg vĩ mũ gé sir. “Hã vễ,” he ag tóg mũ. Kỹ kófa ag tóg mũgmũg ke kãn mũ sir, “Topê vỹ tỹ ã nĩ,” hen kỹ.

Jesus tỹ livro tógfi kygvãn

6 ¹Kỹ sóg cordeiro tỹ ti tógfi ve kavãn vég mũ sir, ti tógfi tỹ 7 (ke) ên ag kã ùn ve ên ti. Kỹ sóg nén nê tỹ 4 (ke) ag kã ù vĩ mẽg mũ gé sir. Ti vĩ vỹ ta tỹ tỹrỹr he ri ke nĩ. “Tág!” he tóg. ²Kỹ sóg vễsỹjãm êvãnh kỹ cavalo kupri vég mũ. Û tỹ kri nĩ vĩ vyj tỹ no rêr tỹ pễg jafã vyn kỹ nĩ nĩ. Ti mỹ ag tóg krĩ tógfi jun mũ, ti tỹ tỹ êprã ke kri ke jẽn kỹ. Kỹ tóg vễnh kar ag tỹ ã krêm ke han tĩ mũ.

³Kỹ cordeiro vỹ ti tógfi ù kavãg mũ gé. Ti tógfi régre tá krỹg vễ sir. Kỹ nén nê ag kãmĩ ù tóg: “tág!” he mũ gé. ⁴Kỹ cavalo kusũg vỹ jun mũ. Û tỹ kri nĩ mũ ên mỹ ag tóg rógro tẻj jun mũ, ti tỹ êprã ke ag tỹ jagnê kato vãsãnsãn han jẻ, êprã ke ag tỹ jagnê kãgtẻn jẻ sir.

⁵Kỹ cordeiro ên tóg ti tógfi ù kavãg mũ gé. Ti tógfi tãgtũ tá krỹg vễ sir. Kỹ nén nê ag kãmĩ ù tóg: “tág!” he mũ gé. Kỹ sóg vễsỹjãm êvãnh kỹ cavalo sã vég mũ sir. Û tỹ kri nĩ ên vỹ ẻg tỹ nẻn ù kar kufyg jafã mãn kỹ nĩ nĩ, ẻg tỹ nẻn ù kar kãmun jafã ti. ⁶Kỹ sóg nén nê tỹ 4 (ke) ên kã vễnh vĩ ù jẻmẻg mũ gé, kỹ tóg: “trigo tỹ quilo pir mãn jẻ ag tóg ke mũ, por dia kaja to,” he mũ, “ke tũ nĩn kỹ ag tóg cevada tỹ quilo tãgtũ mãn ke mũ, por dia kaja ên to. Azeite vóg tũg nĩ hã ra, vinho vóg tũg nĩ gé, ên vỹ kaja pir nĩnh mũ,” he tóg mũ, vễnh vĩ ti.

⁷Kỹ cordeiro ên tóg ti tógfi ù kavãg mũ gé. Ti tógfi tỹ 4 (ke) tá krỹg vễ sir. Kỹ nén nê ag kãmĩ ù tóg: “tág!” he mũ gé. ⁸Kỹ sóg cavalo ù vég mũ, hã ra tóg vẻser jẻgtãn h ri ke nĩ. Û tỹ kri nĩ ên tóg ẻg tẻn tĩ, kỹ vễnh kuprĩg ag vỹ ti nẻn kãmũ mũ gé, ti kãtig ên kã. Ag tỹ êprã ke ag tỹ vễnh kãpẻv tỹ 4 (ke) ag kã ti vễnh kãpẻv pir ag kãgtẻn ke vễ, rógro tỹ, ag kẻkĩr tỹ ke gé, vễnh kaga tỹ ke gé, mĩg tỹ ke gé.

⁹Kỹ cordeiro vỹ ti tógfi ù kavãg mũ gé. Ti tógfi tỹ 5 (ke) tá krỹg vễ sir. Kỹ sóg nĩgja sĩnvĩ ên krêm êvãnh kỹ êprã ke ag kuprĩg vigvég mũ, ag tỹ Topẻ vĩ tugrĩn ùn kãgtẻn mũ ag kar kuprĩg ti. Topẻ vĩ tẻ to krẻnh ke ja tũ ag tóg nỹtĩ, hã kỹ ag tóg ag kãgtẻn ja nĩgtĩ, ù tỹ ag vĩ jẻmẻ sẻr tũ ên ag. ¹⁰Ên ag vỹ jamã hár(a) tag tẻ mũ, ha mẽ: “kake!” he ag tóg mũ. “Ûn mág vỹ tỹ ã nĩ. ã tỹ nẻn tẻ mũ ên han ã tẻg tĩ. Hã ra ẻg tẻg hur ã tỹ nẻn han ke mũ jãvãnh mág. ã mỹ kãnhmar êprã ke ag jykre tugnỹm sẻr tũ, ã tỹ ag vẻg kẻnãn jẻ, ag tỹ ẻg kãgtẻn ja tag tugrĩn?” he ag tóg mũ, ag tỹ Jesus tugrĩn ùn kãgtẻn mũ ên ag. ¹¹Kỹ ag tóg ag mỹ kur kupri junjun mũ sir, kỹ ag tóg ag mỹ: “toreg ver!” he mũ. “Û ag tẻg nỹtĩ gé, ag tỹ ùn kãgtẻn mũ ù ag. Ag tỹ ãjag kãgtẻn ja ri ke han ke vễ, ãjag mrẻ ke ù ên ag tỹ. Topẻ vỹ ag nĩgkrẻ, kỹ tẻg ki kanhrẻ nĩ, ag tỹ ù tỹ hẻn ri ke kãgtẻn ke mũn ki. Ag tỹ ãjag mrẻ ke ên ag kãgtẻn kãn kar kỹ tẻg ag jykre tugnỹm kãn ke mũ, ha vẻmĩ,” he tẻg, ag tỹ ùn kãgtẻn mũ ên ag mỹ.

¹²Kỹ sóg cordeiro ve mãn mũ, kỹ tẻg livro tógfi ù kavãg mũ gé. Ti tógfi tỹ 6 (ke) tá krỹg vễ sir. Kỹ ga tẻg jũrũn ke mũ ha. Rã vỹ kuty! he mũ, ẻg tỹ ù ter kỹ kur sã tu tĩ kuty ên ri ke. Kysã vỹ kusũg! he mũ gé. ¹³Kỹ krĩg vỹ vãr kãn ke mũ gé. Kejẻn kãka tẻg ka tỹ vyryn vyryn ke tĩ, kỹ ti kanẻ tẻg vãr kãn tĩ, ti tãn h ra. Ge ti nĩgtĩ,

krīg vār kân ke mû tag ti. ¹⁴Kÿ kanhkã vÿ tûg' he mû gé, êg tÿ livro grîn ên ri ke ti nî, kanhkã tûg ti. Pânónh vÿ tûg kân mû gé, goj vâso kar ke gé. ¹⁵Êprã ke ag vÿ pânónh nor krêm vênh pigjunh mû, pãró vâso krêm, pânónh vâso krêm ke gé, pã'i ag, vênh kar kri ke ag, soldado ag pã'i ag mré hã, ùn rico ag mré hã, ùn tar ag mré hã, ùn camarada ag mré hã, ag patrão ag mré hã, êprã ke kar ag mÿr, ha mē. ¹⁶Kÿ ag tóg pânónh mÿ vî mû, pãró mÿ ke gé. “Ha êg kri vár, ha êg kri tÿ tam ké,” he ag tóg mû, ón kÿ, pãró mÿ. “Ha êg pigju. Cordeiro ên vÿ êg to jû mû, kÿ ù tÿ nîgja sînvî kri nî ên vÿ êg ki êvãnh mû. Ag jo êg pigju,” he ag tóg mû ón kÿ, êprã ke kar ag, pânónh kar mÿ. ¹⁷“Ag tÿ êg to jûnh ke vê. Pétêm ti huri, kurã kórég tag ti. Krenkren ke tû êg tóg nî,” he ag tóg mû, êprã ke kar ag, cordeiro ên jû kamêg kÿ.

Topê tÿ jênê jafã tÿ ùn e ag ránrán

7 ¹Kÿ sóg ga fyr mî êvãnh kÿ Topê tÿ jêgnê jafã tÿ 4 (ke) ag vigvég mû. Ga péno tÿ 4 (ke) ki ag jêgêg kÿ nÿtî. Kãka tÿ 4 (ke) vÿ tá nÿtî gé. Kÿ ag tóg kãka tÿ 4 (ke) ên ag ki rîr nÿtî, kãka tÿ hê kátã mû tû nî jé. Kÿ kãka tóg tû tî, ga kri, goj kri ke gé, ka kãmî ke gé. ²Rã jur ja tá sóg Topê tÿ jênê jafã ù kâtig vég mû gé. Topê tÿ êg ránrán jafã ma tóg kâtî mû. Kÿ tóg kanhkã ra täpyr mû. Kÿ tóg Topê tÿ jêgnê jafã tÿ 4 (ke) ên ag mÿ vî mû. Topê vÿ ag mÿ: “ga mré goj kókén nî,” he ja nî, ù tÿ 4 (ke) ên ag mÿ. ³Kÿ ù tÿ vênh rán jafã ma kâtî mû ên tóg ag mÿ: “toreg ver!,” he mû. “Ga vóg tûg nî ver, goj ke gé, ka ke gé,” he tóg. “Êg tÿ ver Topê camarada ag ránrán sór vê, vênh rán jafã tag ti tÿ, ag kakã ki,” he tóg, Topê tÿ jênê jafã ti, ù tÿ 4 (ke) ên ag mÿ. ⁴Kÿ tóg ag rán tî mû. Û tÿ 140 mil (ke) ag hã vê, fag mré hã, ti tÿ Israel krê'krê ag kar kãmî ùn ránrán mû ag. Ti número mē inh. ⁵Judá krê tÿ 12 mil (ke) tóg rán kÿ nÿtî, Rubem krê tÿ 12 mil (ke) ke gé, Gade krê tÿ 12 mil (ke) ke gé, ⁶Aser krê tÿ 12 mil (ke) ke gé, Naftali krê tÿ 12 mil (ke) ke gé, Manassés krê tÿ 12 mil (ke) ke gé, ⁷Simeão krê tÿ 12 mil (ke) ke gé, Levi krê tÿ 12 mil (ke) ke gé, Issacar krê tÿ 12 mil (ke) ke gé, ⁸Zebulom krê tÿ 12 mil (ke) ke gé, José krê tÿ 12 mil (ke) ke gé, Benjamim krê tÿ 12 mil (ke) ke gé. Ên ag ránrán kân tóg mû, Topê tÿ jênê jafã ti.

Ûn e tÿ Topê mÿ vî há han

⁹Tag pãte sóg ùn tÿ hên ri ke ag vigvég mû. E tävîn ag nÿtî, e tävîn, kÿ ù tÿ ag nîgrén ke tóg tû tî. Tÿ ag êprã ke ja nÿtî. Nação kar kãmî ke ù ag vÿ tá nÿtî, pã'i kar krêm ke ù ag ke gé, povo kar kãmî ù ag ke gé, vênh vî kar tó tî ag kãmî ù ag ke gé. Kur kupri rînh kÿ ag tóg nÿtî, ùn e ên ag. Nîgja sînvî ên pénin ag tóg jêgêg kÿ nÿtî, cordeiro rînve tá, tänh féj génh kÿ ag tóg nÿtî. ¹⁰Ên ag vÿ jamã hár(a): “Topê hã vÿ êg krenkren han mû,” he mû. “Û tÿ nîgja sînvî kri nî ên vÿ êg krenkren han mû, cordeiro ti ke gé,” he ag tóg mû, jamã hár(a), ùn e ên ag.

¹¹Topê tÿ jêgnê jafã kar ag vÿ nîgja sînvî ên pénin nÿtî gé, ùn e ên ag mré. Kófa ên ag pénin ag nÿtî, nén nê tÿ 4 (ke) ên ag pénin ke gé. Nîgja sînvî ên krêm ag tóg mügmüg ke mû, kÿ ag tóg ù tÿ kri nî ên mÿ: “Topê vÿ tÿ ã nî,” he mû. ¹²Kÿ ag tóg: “ha vé, vênh kar jé Topê hã mÿ vênh vî há tó,”

he mü. “Topē hã vỹ sīnvī jē, Topē hã vỹ ki kanhró nī, Topē hã mỹ ěg tóg vĕnh vī há tó tí. Tỹ tóg ũn mág jē, vĕnh kar kri tóg jē, tar tóg jē, Topē ti, ũri, kỹ tóg tũ! henh ke tũ nī gé. Hã vĕ,” he ag tóg mü, Topē tỹ jĕgnĕ jafã ag.

¹³Kỹ kófa ěn ag kã ũ tóg inh mỹ: “ag tỹ hē ri ke nē hĕn, hã kỹ ag tóg kur kupri rinh kỹ nỹtĩ?” he mü. ¹⁴Kỹ sóg ti mỹ: “inh pi(jé) ki kanhró nĩ!” he mü. “Ā hĕn tóg ki kanhró nī,” he sóg ti mỹ. Kỹ tóg inh mỹ: “nén ũ jagy mág pĕ ve ja ag tóg nỹtĩ, cordeiro tugrĩn,” he mü. “Ag vóg kónãn jagy han ja ag tóg. Ag kur kygfa ag, cordeiro kyvĕnh tỹ, kỹ tóg kupri nỹtĩ, ag kur ti. ¹⁵Kỹ ag tóg Topē nĕgja sĕnvī pĕnĩn nỹtĩ. Ti rãnrãj han ag tóg tí, kurã kar ki, kuty ki ke gé, ti ĩn krĕm. Ũ tỹ nĕgja sĕnvī kri nī ěn vỹ ag jy nĕgãn mü. ¹⁶Ag pi(jé) kókir mãn ke mü!, ag pi(jé) og’og sór mãn mü!. Rã vỹ ag ki hupũn mãn ke tũ nī ha, nén ũ gru ke gé, ¹⁷cordeiro tỹ ag ki rĩr kỹ, ũ tỹ nĕgja sĕnvī tá jē ěn ti. Ag tatĩ tĩg jé tóg ke mü, goj nihỹg ja ra, goj tỹ ag rĩnrĩr han mü ěn ra tóg ag tatĩ tĩg ke mü. Topē vỹ ag kygfỹ tỹ tũg! henh ke mü,” he tóg inh mỹ, kófa ti, ũn e ěn ag to.

Jesus tỹ livro tógfĩ tỹ ěgno kavãn

8 ¹Kỹ cordeiro vỹ livro tógfĩ tỹ ěgno kavãg mü. Ti tógfĩ tỹ 7 (ke) tá krỹg hã vĕ. Kỹ tóg katy! he mü, kanhkã tá, meia hora ki. ²Kỹ sóg Topē tỹ jĕgnĕ jafã tỹ 7 (ke) ag vég mü. Ag mỹ ag tóg trombeta tỹ 7 (ke) junjun mü. Topē nĕgja sĕnvī jo ag tóg nỹtĩ.

³Kỹ Topē tỹ jĕnĕ jafã ũ tóg tá jun mü gé, kỹ tóg ouro tỹ pĕnky ma kãtĩ mü, ěg tỹ pĕnky ki Topē mỹ ti ger há pũn jafã ěn ti. Nĕgja sĕnvī ěn to tóg jē mü, Topē tỹ jĕnĕ jafã ti. Kỹ ag tóg ti mỹ ka jĕnjo ger há tỹ hĕn ri ke jun mü, ti tỹ Topē mỹ pũn jé, Topē nĕgja to jĕn kỹ. Ēprã ke tỹ Topē ki ge kỹ nỹtĩ kar ag tóg Topē mré vĕmĕn tí. Ag vĩ ja ěn mré tóg ti ger há ěn pũn sór mü, Topē mỹ, Topē tỹ jĕnĕ jafã ti. ⁴Kỹ tóg sir pũn mü, Topē kato jĕn kỹ. Kỹ ti ger há ěn tóg kynhmỹ tãpřy mü sir, Topē tũ ag tỹ ti mré vĕmĕn ja ěn mré hã. ⁵Kỹ Topē tỹ jĕnĕ jafã ěn tóg pĕnky ěn fãn mü, prãnh gru tỹ. Topē mỹ nén ũ kar pũn jafã tá tóg prãnh gru ěn mág mü, kỹ tóg pĕnky kãkã nĕm mü. Kỹ tóg ga kri ti fón mü sir, pĕnky ti, prãnh gru tỹ kãkã nĕn kỹ. Kỹ ta tóg kómkóm ke kỹ tỹrřr he mü, jũ kỹ tóg mrãrãn ke mü gé, ga kri. Kỹ ga tóg jũrũn ke mü gé sir.

Ag tỹ trombeta kynkyn

⁶Kỹ Topē tỹ jĕgnĕ jafã tỹ 7 (ke) ěn ag tóg vĕnh kãn mü sir, ag tỹ trombeta kynkyn jé. ⁷Kỹ ũn tóg ã tũ kyn vĕn mü. Kỹ nãfy tóg ěprã ke ag kri vãr mü, pĩ mré hã, vĕnh kyvĕnh mré hã ke gé. Kỹ ka vĕnh kãpóv tãgtũ ag kã ti vĕnh kãpóv pir tóg kugpũr kãn mü, ga vĕnh kãpóv pir ke gé. Re vỹ pũr kãn pĕ han mü sir.

⁸Kỹ Topē tỹ jĕgnĕ jafã tỹ 7 (ke) ěn ag kã ũ tóg trombeta kyn mü gé. Trombeta régre tá krỹg vĕ sir. Kỹ nén ũ tóg goj kafã tũ ki kutĕ mü, hã ra tóg tỹ pãnónh gru nī ve nī, pãnónh mág tãvĩ. Kỹ goj vĕnh kãpóv tãgtũ ag kã ti vĕnh kãpóv pir tóg vĕnh kyvĕnh ri ke nī ha. ⁹Goy ga vĕnh kãpóv tãgtũ ag kã

ti vènh kápóv pir tóg kágter kân mũ gé. Goj kri mũ mũ ên, barco ên vènh kápóv tăgtũ ag kã ti vènh kápóv pir tóg tũ' he kân mũ gé, pãnónh ên tugrĩn.

¹⁰Kỹ Topê tỹ jëgnê jafã tỹ 7 (ke) ên ag kã ù tóg trombeta kyn mũ gé. Trombeta tăgtũ tá krýg vê sir. Kỹ kríg mág pẽ tóg kanhkã tá kãtère mũ, hã ra tóg gru nĩ, pĩ gru ên ri ke. Kỹ tóg êganê vènh kápóv tăgtũ ag kã ti vènh kápóv pir kri kutê mũ, goj nihýg vènh kápóv tăgtũ ag kã ti vènh kápóv pir kri ke gé. ¹¹Kríg ên jyjyn hã vỹ: “Fa,” he mũ. Kỹ goj ên tóg fa nĩ sir. Kỹ êprã ke tỹ hên ri ke ag kágter mũ, goj kórég ên kron kỹ.

¹²Kỹ Topê tỹ jëgnê jafã tỹ 7 (ke) ên ag kã ù tóg trombeta kyn mũ gé. Trombeta tỹ 4 (ke) tá krýg vê sir. Kỹ nén ù tóg rã kókég mũ, kỹ jëngrê tóg sĩ' he mũ ha, kysã jëngrê ti ke gé, kríg kar jëngrê ti ke gé. Jëngrê vènh kápóv tăgtũ ag kã ùn pir tóg tũg' he mũ ha. Kỹ kurã tóg sĩ nỹ ha, jãvo kuty tóg kuty tăvi nỹ ha.

¹³Kỹ sóg kónhkó mág vég mũ, ti tẽ tĩn kỹ, kynhmỹ. Ên vỹ jamã hár(a) prêr mũ. “!..Jagy ti tĩnh mũ, jagy ti tĩnh mũ, jagy ti tĩnh mũ, êprã ke ag mỹ..! ..Topê tỹ jëgnê jafã tăgtũ ù ag vỹ ãjag tũ ti kynkyn ke mũ ha, kỹ tóg kórég tăvi nỹnh mũ ha, êprã ke ag mỹ..!” he tóg mũ, kónhkó mág ti.

9 ¹Kỹ Topê tỹ jëgnê jafã tỹ 7 (ke) ên ag kã ù tóg trombeta kyn mũ gé. Trombeta tỹ 5 (ke) tá krýg vê sir. Kỹ sóg kríg vég mũ. Kanhkã tá tóg kãtère ja nĩ, êprã, kríg ên ti. Kỹ ag tóg ti mỹ nũgme nón jafã fig mũ, chave ti, kríg ên mỹ. ²Kỹ tóg róm mũ sir, nũgme ti, hã ra nija tóg tá tũmtũm ke mũ, nija tar pẽ. Kỹ rã tóg kuty' he mũ, nija ên to. Ga kri tóg kuty' he kân mũ. ³Nija ên kãtã tóg vãhã kãpa mũ, tỹ ópã tỹ hên ri ke nỹti ve ti, hã ra tóg pỹn kakrã tar ri ke nỹti, tỹ ópã nỹti ve ên ti. ⁴Ti pi(jé) re ko tĩ', ti pi(jé) ka féj ko tĩ', ti pi(jé) êkré ko tí gé'. Ti tỹ êprã ke ag mỹ vènh kaga han kãtig vê. Êprã ke ù ag tóg tỹ Topê tỹ rágrã tũ nỹti, ag kakã ki. Ên ag mỹ vènh kaga han jé ag junjun mũ, tỹ ópã nỹti ve ên ag. ⁵Ag pi(jé) êprã ke ag kãgtén mũ hã ra! Kysã tỹ 5 (ke) ki ag tóg êprã ke ag mỹ vènh kaga nĩm mũ. Ag tỹ ag vóg kỹ tóg pỹn kakrã tỹ êg tugtãn ri ke nĩ, ti kaga ti. ⁶Kỹ êprã ke ag tóg ter sór mũ ha, ti kaga jagy to, hã ra ag tóg ter ke tũ nĩ, kysã tỹ 5 (ke) ên ki. Ag tỹ ter sór mũ ra ag tóg ter ke tũ pẽ nĩ.

⁷Ópã ên tóg tỹ cavalo nỹti ve nĩ, cavalo tỹ vènh génh mũnh ke ri ke tóg nỹti. Ouro tỹ krĩ tógfi ag tóg nỹti. Ag kakã vỹ êg kakã ri ke nĩ. ⁸Ag gãnh vỹ fag gãnh téj ri ke nĩ gé. Ag jã vỹ mĩg jã ri ke nĩ. ⁹Ag fe fãr tóg ferro tỹ camisa ri ke nĩ. Ag fêr tỹ rãnhrãnh he tóg mẽ há tĩ, kỹ tóg cavalo tỹ hên ri ke tỹ carroça tỹ hên ri ke nỹgnỹn ri ke nĩ, ag tỹ vènh génh mũnh ken kỹ. ¹⁰Ag my kã tóg nĩ, ag préj ti, pỹn kakrã préj ri ke ti. Ag my tỹ ag tóg êprã ke ag vóg kónãn tĩ, kysã tỹ 5 (ke) ki. ¹¹Û tỹ nũgme ki rĩr tĩ ên, ù tỹ Topê tỹ jënë jafã ri ke nĩ ên vỹ tỹ ag pã'i mág nĩ, ópã ên ag pã'i mág. Hebreu ag vĩ ki ti jiji vỹ: Abadom, he mũ, kỹ tóg Grego ag vĩ ki: Apolião, he mũ, hã vỹ: nén ù kar kókég tĩ, he mũ, êg vĩ ki, hã vỹ: Apolião, he mũ.

¹²Nén jagy ve ve inh huri, sỹ nén jagy régre venh ke nê ha.

¹³Kỹ Topê tỹ jëgnê jafã tỹ 7 (ke) ên ag kã ù tóg trombeta kyn mũ gé. Trombeta tỹ 6 (ke) tá krýg vê sir. Kỹ sóg vènh vĩ mæg mũ. Topê mỹ nén ù pũn

jafã tỹ ouro tá tóg mẽ há tĩ, vãnh vĩ ti. Mesa ên péno tỹ 4 (ke) ki, mesa tỹ Topẽ jo jẽ ên ki tóg mẽ há tĩ, vãnh vĩ ti. ¹⁴Vãnh vĩ ên tóg ù tỹ ùri kyn mũ ên mỹ: “Topẽ tỹ jěgně jafã tỹ 4 (ke) ên kygvãn tĩg,” he mũ. “Û tỹ goj mág tỹ Eufrates tá sigse ký nỹtĩ ên ag kygvãn tĩg,” he tóg. ¹⁵Kỹ tóg ag kygvãn tĩ mũ, ù tỹ 4 (ke) ên ag. Tá ag tóg jãvãnh nỹtĩ ja nigĩtĩ, ag tỹ êprã ke tỹ hẽn ri ke ag kãgtén jé. Topẽ vỹ ag mỹ ag tỹ prỹg ki ag kãgtén ke, kysã ki ag kãgtén ke, kurã ki ag kãgtén ke, hora ki ag kãgtén ke mũ ên nĩm ja nĩ. Êprã ke vãnh kãpóv tãgtũ ag kã ùn pir ag kãgtén kãn jé ag tóg ke mũ, Topẽ tỹ jěgně jafã tỹ 4 (ke) ên ag. ¹⁶Ag krẽm soldado ag número mẽ inh, ù tỹ cavalo kri mũgtĩ ag. 200 mil (ke) ag nỹtĩ, ag krẽm soldado ag. ¹⁷Kỹ sóg ag vég mũ, soldado tỹ cavalo kri mũ mũ ag. Ferro tỹ camisa ag nỹtĩ, ký ù ag tóg kusũg nỹtĩ, pĩ kusũg ri ke, ù ag tóg tánh nỹtĩ, pó tỹ safir tánh ri ke, ù ag tóg māréro nỹtĩ, pó tỹ enxofre māréro ri ke. Cavalo krĩ vỹ mĩg krĩ ri ke nỹtĩ. Ag jěnkã tá pĩ gru tóg kãkutẽ mũ, nija ke gé, pó tỹ enxofre nija ke gé, vãn pũr nija ri ke ên ti. ¹⁸Tag tỹ ag tóg êprã ke ag kãgtén ke mũ, pĩ tỹ, nija tỹ, pó tỹ enxofre nija tỹ ke gé, cavalo ag. ¹⁹Nén tỹ cavalo jěnkã tá kãkutẽ mũ ên vỹ êprã ke ag kãgtén ke mũ, ký ag my vỹ ag kãgtén ke mũ gé. Ag my vỹ tỹ pỹn hã ve nĩ, pỹn krĩ. Ên tỹ ag tóg êprã ke ag kókén ke mũ gé, ag my tỹ.

²⁰Êprã ke ù ag tóg hã ra krenkren ke mũ ver. Ag kãgtén kãn ke tũ ag tóg nĩ ver. Ký ùn krenkren mũ ag pi(jé) Nén-Kórég ag tovãnh mũ', vãnh kãggrã tovãnh tũ ag nỹtĩ, ouro tỹ vãnh kãggrã ên, prata tỹ vãnh kãggrã ên, ferro kusũg tỹ vãnh kãggrã ên, pó tỹ vãnh kãggrã ên, ka tỹ vãnh kãggrã ên ke gé. Ver ag tóg tag kar to: “Topẽ vỹ tỹ ti nĩ,” he tĩ gé. Ag tỹ vėsóg ki vãnh kãggrã hyn han mũ ra tóg ag mỹ tỹ Topẽ nĩ ve nĩ, ti kanẽ tũ ra, ti nĩgrẽg nor tũ ra, ti tỹ ã pẽn tỹ tĩg vãnh (hã) ra. ²¹Ag pi(jé) ag jykre tovãnh sór mũ', êprã ke krenkren mũ ên ag. Jagně kãgtén ag tóg mũgtĩ, kujã jykre han ag tóg mũgtĩ, curandeiro jykre ên ti. Ajag prũ tũ fag mré ag tóg nỹgnỹ mũgtĩ, ajag mén tũ ag mré fag tóg nỹgnỹ mũgtĩ gé, jagně tỹ nén ù pigju(g) ag tóg mũgtĩ gé, êprã ke ag.

Livro sĩ

10 ¹Kỹ sóg Topẽ tỹ jěně jafã tar ù vég mũ. Kanhkã tá tóg kãtère mũ, êprã. Kanhkã góg vỹ ti kri rũm ký nỹ nĩ. Ti krĩ kri ta no tóg vãnh ven mũ. Ti kakã vỹ rã ri ke nĩ, ti fa vỹ pĩ gru ri ke nỹtĩ, ti fa jěngrẽ ti. ²Livro sĩ mãn ký tóg jẽ nĩ, livro tỹ jén ke ký tóg ma jẽ nĩ. Ā pẽgja tỹ tóg goj kafã tũ sãn mũ, ký tóg ã jakãnh tỹ ga sãn mũ. ³Prěr tóg mũ sir, jamã hár(a), ký tóg tỹ mĩg kyr mẽ tĩ, ti prěr ti. Ký ta tỹ tỹrỹr he tỹ 7 (ke) vỹ ti vĩ kafãnh mũ, jamã hár(a). ⁴Kỹ sóg ta tỹ tỹrỹr he mũ vĩ ên rán sór mũ. Hã ra ù tỹ kanhkã tá vĩ mũ tó inh mỹ: “rán tũg nĩ,” he mũ. “Ta tỹ tỹrỹr he mũ ên vĩ tó sór tũg nĩ, ù mỹ,” he tóg.

⁵Kỹ Topẽ tỹ jěně jafã ên, ù tỹ goj mré ga kri jẽ mũ ên tóg ã nĩgé tỹ kanhkã ki ven mũ, ã pẽgja tỹ. ⁶Kỹ tóg: “sỹ ki hã tónh ke vẽ,” he mũ. “Topẽ vỹ ki kanhró nĩ, sỹ ki hã tó mũn ki,” he tóg. “Ûn rĩr nĩ ên vỹ ki kanhró nĩ, ùn ter vãnh ên vỹ ki kanhró nĩ, ù tỹ kanhkã han mũ ên vỹ ki kanhró nĩ, ù tỹ ga han mũ ên ti, ù tỹ goj han mũ ên ti, ù tỹ ùn rĩnrĩr nỹtĩ kar ag hyn han mũ ên ti. Ên hã vỹ isỹ

ki hã tó mũ ki kanhró nĩ,” he tóg. “Ha vé, ã tỹ nén han ke mũ ên tovãnh mãn ke tũ ti nĩ ha, Topê ti. ⁷Ti tỹ jëgně jafã tỹ 7 (ke) ên ag kã ù vỹ trombeta kyn ke mũ, kỹ tóg ù tỹ 7 (ke) tá krỹg ke mũ. Ti tỹ kyn kỹ Topê vỹ ã tỹ nén han sór mũ ên han ke mũ ha, ã tỹ vãsỹ to jykrén mũ ên ti. Hã tó ja ti nĩ, ti rãnhraj han tĩ ag mỹ, ti vĩ tó ti ag mỹ ke gé, Topê ti,” he tóg, Topê tỹ jënë jafã ti.

⁸Kỹ kanhkã tá ke ù tóg inh mré vēmén mãn mũ. Inh mỹ tóg: “ha tĩg,” he mũ. “Livro sĩ tỹ jén ke kỹ nĩ ên mãn tĩg,” he tóg. “Û tỹ goj mré ga sãn kỹ jẽ ên ki livro mãn tĩg,” he tóg, kanhkã tá ke ên ti. ⁹Kỹ sóg ti ra tĩ mũ, kỹ sóg ti mỹ livro to vĩ mũ. Kỹ tóg inh mỹ: “té, ko ra,” he mũ. “Mỹg ri ke ti nĩ, ã tỹn kon kỹ. Ko kar kỹ tóg hã ra fa nĩnh mũ, ha vemnĩ,” he tóg. ¹⁰Kỹ sóg livro sĩ ên mãn kỹ ko mũ. Kỹ tóg mỹg ri ke nĩ. Isỹn ko kar kỹ tóg fa nĩ sir.

¹¹Kỹ ù tóg inh mỹ: “Topê tỹ nén hyn han ke mũ tó mãn jé ã tóg ke mũ,” he mũ. “Ti tỹ povo kar ag tỹ nén hyn han ke mũ tó jé ã tóg ke mũ, ti tỹ nação kar ag tỹ nén hyn han ke mũ ên ti, ti tỹ pã'i krēm ke kar ag tỹ nén hyn han ke mũ ên ti, ti tỹ pã'i kar ag tỹ nén hyn han ke mũ ên ti ke gé,” he tóg, vènh vĩ ti.

Û tỹ Topê vĩ tó tĩ ag

11 ¹Kỹ ag tóg inh mỹ vãn jun mũ, vãn tỹ nén ù kãmun jafã ti. Kỹ ù tóg inh mỹ: “tág!” he mũ. “Topê jo ìn kãmun nĩ, Topê mỹ nén ù pũn jafã mré hã. Û tỹ krēm Topê mré vēmén kỹ nỹtĩ ên ag nĩgkrén nĩ gé. ²Topê jo ìn vãso ên kãmun tũg nĩ hã ra. Fóg ag tũ vè, kỹ kãmun tũg nĩ. Kysã tỹ 42 (ke) ki fóg ag tóg cidade ên kókén ke mũ, Topê tỹ cidade ù to: isũ vè, he mũ ên ti. ³Û tỹ inh vĩ tó tĩ régre ag jëgně jé sóg ke mũ. Ēg tỹ nén ù tỹ ěg mỹ e nĩn kỹ kur kórég rĩg tĩ ên rĩnh jé ag tóg ke mũ, sacco ên, ùn régre ên ag. Isỹ ag mỹ nén tónh ke mũ ên tó jé ag tóg ke mũ, kurã tỹ 1260 (ke) ên kí,” he tóg inh mỹ, ag kãmĩ ù ti.

⁴Topê vĩ tó tĩ régre ên ag vỹ Topê vĩ to tar nỹtĩ, ka tỹ oliveira tar nĩ ên ri ke ag nỹtĩ. Topê vĩ tó ag tóg tĩ, kỹ ag tóg néj gru ri ke nỹtĩ, néj tỹ kri fëg jafã ên kri nỹtĩn kỹ. Û tỹ ěprã ke ag kri ke ên rã hã ti nỹtĩ, vela tỹ kri fëg jafã régre ên ag. Tag ri ke ag nỹtĩ, Topê vĩ tó tĩ régre ên ag. ⁵Û tỹ ag kato vãsãn kỹ ag tóg pĩ tỹ ag jënkã tá kãkutê mũ ên tỹ ag tỹ tũ! he tĩ, ù tỹ ag kato vãsãnsãn mũ ag tỹ. Hã kỹ ag kãgter kãn! he tĩ, ù tỹ ag vóg kónãn sór mũ ag. ⁶Ag tỹ Topê vĩ tón kỹ ag tóg ag tỹ ta kutê kamëg sór kỹ ti kutê kamëg tĩ, kỹ tóg kutê tũ nĩgtĩ. Kỹ, ag tỹ goj tỹ vènh kyvènh ri ke han sór kỹ ag tóg tỹ vènh kyvènh ri ke han tĩ gé. Ag tỹ ga kri ke ag vóg kónãn sór kỹ ag tóg ag vóg kónãn tĩ gé. Nén ù jagy tỹ hèn ri ke han ag tóg tĩ, Topê vĩ tó tĩ régre ên ag.

⁷Kejën ag tóg kãmén kãn mũ sir, Topê tỹ ag mỹ nén tó mũ ên ti. Kỹ nũgme tá mĩg tóg kãkutê mũ, kỹ tóg ag to rá ke mũ. Ag tỹ hẽ nỹ ri ken kỹ tóg ag kãgtén mũ, mĩg ên ti. ⁸Ájag kãgter kỹ ag tóg cidade kuju tá vár kỹ nỹtĩ nĩ, ěg Senhor tỹ cidade tá ka to sa ja ên tá. Cidade ên tá ke ag jykre tóg cidade tỹ Sodoma tá ke ag jykre ri ke nĩ, ga tỹ Egito tá ke ag jykre ri ke ti nĩ gé. ⁹Kurã tãgtũ mré kurã kuju ki ag tóg vëser ên vigvég mũ. Vènh kar ag vỹ ag vigvég mũ, povo kar ag, pã'i krēm ke kar ag, vènh vĩ kar tó tĩ ag kar ke gé. Ag pi(jé) ga krēm ag pigjunh

ke mû', vēser ěn ag. ¹⁰Ēprā ke kar ag mÿ tóg sér tí, ag kăgter ti. Festa mág han ag tóg mû. Jagně mÿ ag tóg presente jĕgnĕg mû. Topĕ vĭ tó tí tag ag vÿ ěprā ke ag vóg kónān jagy han ja nĭgtĭ, hā kÿ ag kăgter tóg vēnh kar mÿ sér gy tí sir.

¹¹Kurā tāgtŭ kri kurā kuju tŭg kÿ Topĕ tóg hā ra ag rĭn mĕn mû sir, ti kuprĭg tÿ. Kÿ vēnh kar ag tóg jŭrŭn ke pĕ han mû sir. ¹²Kÿ kanhkā tá vēnh vĭ tóg ag mÿ mĕ há tí, Topĕ vĭ tó tí régre tag ag mÿ. Kÿ tóg ag mÿ: “kunĭg,” he mû. Kÿ ag kato vāsānsān mû ag vÿ ag tÿ kanhkā ra jāpŕy vég mû sir, kanhkā góg kāmĭ. ¹³Kÿ ga tóg jŭrŭn ke mû sir. Cidade tá ĩn kókég tóg mû, ga tÿ jŭrŭn ke ti. ĩn vēnh kăpóv tÿ 10 (ke) ag kă ũn pir kókén kĕn tóg mû. Ēprā ke tÿ mil tÿ 7 (ke) vÿ kăgter mû, ěn kă. Ũn kăgter tŭ ag kanĕ tóg jur mû. Ag mŭmĕg vÿ ag kăgtĕn kren mû. Kÿ ag tóg Topĕ to: “ŭn mág vÿ tÿ ti nĭ,” he mû vāhā. “Tar ti nĭ, ũ tÿ kanhkā tĕn ag kri nĭ ěn ti,” he ag tóg mû vāhā.

¹⁴Nĕn jagy ũ vÿ hur tŭ' hé. Nĕn jagy ũ tóg ver kă nĭ nĭ.

Trombeta tÿ ěgno kyr

¹⁵Kÿ Topĕ tÿ jĕgnĕ jafā tÿ 7 (ke) ěn ag kă ũ tóg trombeta kyn mû gé sir. Trombeta tÿ 7 (ke) tá krÿg vē. Kÿ kanhkā tá vēnh vĭ tÿ hĕn ri ke tóg mĕ há nÿtĭ. “Vāhā tóg ěprā ke kar ag kri tÿ ũn mág jĕ, Topĕ ti, ěg Senhor ti ke gé,” he ag tóg, ũ tÿ kanhkā tá vĭ mû ag. “Vāhā ag tóg nĕn ũ kar ki rĭr nÿtĭ ha, Topĕ ti, ā kósĭn mrĕ, kÿ tóg tŭ' hĕnh ke tŭ nĭ, ag rĕnhŕĕj tĭ,” he ag tóg, ũ tÿ kanhkā tá vĭ mû ag.

¹⁶Kÿ kófa tÿ 24 (ke) ěn ag, ũ tÿ Topĕ mrĕ ājag nĭgja kri nĭgnĭ kÿ nÿtĭ ěn ag vÿ ti krĕm mŭgmŭg ke kĕn mû. Kÿ ag tóg Topĕ mÿ: “Topĕ vÿ tÿ ā nĭ,” he mû sir. ¹⁷Jān ag tóg mû gé sir, ha mĕ. “Topĕ, pĕli mág, nĕn ũ kar han há ā tóg nĭ,” he ag tóg mû, jān kÿ. “Vāsÿ ā tóg nĭ nĭ, kÿ ā tóg ũri nĭ nĭ gé. ěg mÿ tóg sér tí, ā tÿ tÿ pĕli mág nĭn kÿ, ā tÿ vēnh kar ki rĭr kÿ tóg sér pĕ tí. Ā tar nĭ kÿ ā tóg pĕli ũ ag pan kĕn. ¹⁸Ag to jŭ jĕ ā tóg ke mû ha. Ũn kăgter ja ag jykŕe tugnÿm kĕn jĕ ā tóg ke mû ha. Povo kar vÿ ā kato vāsānsān ja nĭgtĭ, kÿ ā tóg ag kato vāsān mû ha. Ā kurā vÿ hur jun, kÿ ā tóg ā rĕnhŕĕj han tí ag mÿ ag rĕnhŕĕj kaja ti ven ke mû, ā vĭ tó tí ag mÿ ke gé, ā tŭ kar ag mÿ, ũn mág ag mÿ, ũn kāsĭr ag mÿ, ũ tÿ ā kamĕg nÿtĭ kar ag mÿ ā tóg ag rĕnhŕĕj kaja ven ke mû ha. Ā kurā vÿ hur jun, kÿ ā tóg ũ tÿ ěprā ke ag kókén ja ěn ag kókén kĕn ke mû ha,” he ag tóg mû, kófa tÿ 24 (ke) ěn ag.

¹⁹Kÿ ũ tóg Topĕ jo ĩn nón mû, ĩn tÿ kanhkā tá jĕ ěn. Kÿ Topĕ jo ĩn jānkā róm kÿ jĕ kÿ Topĕ caixa ěn tóg ve há' he kÿ nÿ nĭ, Topĕ tÿ ā tŭ ag mrĕ jykŕĕn kÿ ag mÿ caixa fig mû ěn ri ke ti. Kÿ ta tóg kómkóm ke mû, tÿŕÿŕ he ke gé. Ga vÿ ragra ke jagy han mû sir, kÿ năfy vÿ văr mû gé sir, năfy mág.

Mĭg fĕr kăme

12 ¹Kÿ kanhkā tá nĕn ũ vēnh mÿ tóg vēnh ven mû. Ũn tÿtá fi vÿ tóg vēnh ven mû. Kÿ rā tóg fi mÿ tÿ fi kur nĭ. Kysā sĕn kÿ fi tóg jĕ nĭ. Fi krĭ tógfĭ vÿ krĭg tÿ há nĭ, krĭg tÿ 12 (ke) tÿ. ²Kufy fi tóg jĕ nĭ, hā ra fi tóg kaga mû, kÿ fi tóg jagtar nĭ sir.

³Kỹ kanhkã tá nén ù ù tóg vènh ven mũ gé. Mĩg fêr kusũg tóg vènh ven mũ. ã pir ra tóg krĩ tỹ 7 (ke) nĩ, nĩka tỹ 10 (ke) ti nĩ gé. Ti krĩ tógfĩ tóg nỹtĩ, ti krĩ tỹ 7 (ke) to. ⁴ã my tỹ tóg krĩg tỹ hên ri ke kókég mũ, kỹ tóg êprã vár mũ, krĩg tỹ hên ri ke ti. Krĩg vènh kãpóv tăgtũ ag kã ùn pir kókén kãn tóg mũ. Kỹ tóg ùn tỹtã ên fi jo tá jê nĩ, fi kósin tỹ mur ken kỹ, mĩg fêr kusũg ên ti. Ti tỹ fi kósin mãn sór vè, ti mur kỹ. ⁵Kỹ tóg mur mũ sir, fi kósin ti, hã ra tóg gré nỹ. Tỹ tóg pã'i mág pẽ jênh ke mũ, êprã ke kar kri. Ag kri jênh kỹ tóg ag mỹ vĩ tar gy han ke mũ. Ti mur kỹ ag tóg kanhkã ra ti va mũ mũ, Topẽ nĩgja sĩnvĩ ên ra, mĩg fêr jo. ⁶Kỹ ùn tỹtã ên fi tóg ga kórég ra vènhvãg tĩ mũ, mĩg fêr jo vènh pèju kỹ. Tá Topẽ tóg fi mỹ fi tỹ ki vènh pèjunh ke han ja nĩ. Tá ù tóg fi mỹ vèjên vin tĩ, kurã tỹ 1260 (ke) ki.

⁷Kỹ kanhkã tá vènh génh tóg kutẽ mũ. Topẽ tỹ jègnẽ jafã ag to pã'i mág tỹ Miguel vỹ mĩg fêr ên kato vãsãn mũ, ã krêm ke ag mré. Kỹ mĩg fêr ên tóg ã krêm ke ag mré Miguel to rará mũ gé sir. ⁸Hã ra ag tóg ti tỹ hên ri ke mũ sir, kanhkã tá ke ag, mĩg fêr ên ti tỹ. Kỹ ag tóg kanhkã tá ti kutẽ mũ, ti mré ke kar ag mré hã. ⁹Mĩg fêr ên kutẽ ag tóg mũ sir. Pỹn ve tỹ ùn ve fag krĩn kónãn ên hã vè, Japon hã vè, Satanás hã vè, êprã ke ag tỹ Topẽ kato vãsãnsãn han mũ ên hã vè, hã vỹ: mĩg fêr, he mũ. Ag tỹ kanhkã tá ti kutẽ kỹ ag tóg ga kri ti fón mũ sir, ti krêm ke kar ag mré hã. Kỹ ag tóg ga kri mũgtĩ ha, Japo ag.

¹⁰Kỹ sóg kanhkã tá vènh vĩ ù mæg mũ gé. Jamã hár(a) tóg vĩ mũ, kỹ tóg: "tág!" he mũ. "Êg krenkren han tóg huri, Topẽ ti. Vãhã vènh kar tóg vè, Topẽ tỹ tỹ ùn mág pẽ nĩ ti. Vãhã Cristo tóg vènh kar mỹ ã tỹ tỹ ùn tar nĩ ên ven huri. Ag tỹ ùn kutẽ mũ ên tóg êg mré ke ag kato vĩ kónãn ja nĩgtĩ, Topẽ mỹ, kurã ki, kuty tá ke gé. Hã ra tóg kutẽ kỹ jê ha. ¹¹Êg mré ke ag vỹ ti tỹ hên ri ke ja nĩgtĩ, cordeiro kyvènh ên tigrĩn, vènh vĩ há ên tigrĩn, ag tỹ vènh kar mỹ Topẽ vĩ tó tĩ ên tigrĩn. Ag kã ù kãgtén ja ag tóg nĩgtĩ, hã ra tóg ag mỹ tỹ nén ù tũ nĩ ja nĩgtĩ, ag tỹ Jesus tigrĩn ag kãgtén mũ ra. Hã kỹ ag tóg Japo tỹ hên ri ke ja nĩ. ¹²Ti kutẽ kỹ jênh kỹ tóg kanhkã tãn kar mỹ sér tĩ ha. Hã ra tóg ga kri mũ ag mỹ jagy tĩnh mũ, goj kri mũ ag mỹ ke gé. Japo vỹ ag mré jê ha, ga kri, ag tỹ kanhkã tá ti kutẽ kỹ. Kỹ tóg jũ jagy han kỹ kãnẽ tĩ. Ti kurã vỹ kakó nĩ ha. Tag tigrĩn tóg jũ jagy han kỹ kãnẽ tĩ nĩ, Japo ti," he tóg, ù tỹ kanhkã tá vĩ mũ ti.

¹³Kỹ mĩg fêr ên tóg êprã jê mũ. Kỹ tóg ùn tỹtã ên fi vóg kónãn sór mũ, ù tỹ gĩr vèg mũ ên fi. ¹⁴Kỹ ag tóg fi mỹ fêr mág junjun mũ, kónhkó mág fêr ên ri ke. Kỹ fi tóg tỹ ga kórég ên ra tẽ tĩ mũ. Tá fi tóg vènh pèju kỹ nĩ nĩ, prỹg tăgtũ kri prỹg kuju ki. Kỹ pỹn kórég ên tóg tá fi vóg tũ nĩ ha, fi vènh pèju ja tá. ¹⁵Kỹ tóg goj var ri ke han mũ, pỹn ti. Ti jênkã tá tóg kãkutẽ mũ, goj var ti. Ti tỹ ùn tỹtã ên fi nãr han sór vè. ¹⁶Hã ra ga tóg fi mỹ goj ên tỹ gym ke mũ, goj tỹ mĩg fêr jênkã tá kãkutẽ mũ ên tỹ, kỹ fi tóg ga tigrĩn kren mũ sir. ¹⁷Kỹ mĩg fêr tóg jũ kỹ tĩ mũ, ùn tỹtã ên fi tovãnh kỹ. Kỹ tóg fi krẽ kato vãsãn jé tĩ mũ gé, hã vỹ: ù tỹ Topẽ vĩ ki króm mũ ag, he mũ, fi krẽ ag, hã vỹ: ù tỹ Jesus to krónh ke tũ ag, he mũ, ùn tỹtã ên fi krẽ ag.

¹⁸Kỹ mĩg fêr ên tóg goj fyr ra tĩ mũ.

Mīg régre ag káme

13 ¹Kỹ mīg ù tóg goj mág kátá kăkutē mû. Ā pir ra tóg krī tỹ 7 (ke) nĩ, nĩka tỹ 10 (ke) ti nĩ gé. Ti krī tógfĩ tóg ti nĩka kri nỹti, kỹ ti jygi tóg ti krī kri ránrán kỹ nỹti, ti tỹ tỹ pã'i mág nĩn kỹ, goj kátá mīg ěn ti. Hã ra Topē to vĩ kónãn vē sir, ti krī to ránrán kỹ nỹti ěn ti. ²Goj kátá mīg ěn tóg mīg rá ri ke nĩ. Ti pẽn tóg urso pẽn ri ke nỹti. Ti jẽnky tóg mīg kusüg jẽnky ri ke nĩ. Kỹ mīg fēr ěn tóg goj kátá mīg tỹ pã'i mág pē han mû, ti tỹ ag nĩgja kri nĩ jé, ti tỹ ã jykre tar ěn han jé ke gé, mīg fēr jykre ěn ti. ³Ti krī ù fynh ja ag tóg nĩ, kỹ tóg ter kren, hã ra tóg há' he mãn, goj kátá mīg ěn ti. Ēprã ke kar ag vỹ ti vég mû, kỹ tóg ag mỹ e kar tí. Ti vĩ kri fig ag tóg mû. ⁴Mīg fēr ěn to ag tóg: “Topē vē,” he tí, ěprã ke kar ag, ti jykre tar tugrĩn, ti tỹ goj kátá mīg ěn tar han ja tugrĩn. Goj kátá mīg ěn to ag tóg: “Topē vē,” he tí gé. “Ū tóg ti ri ke tũ pē nĩgtĩ,” he ag tóg tí. “Ū tóg ti tar kãfór tũ nĩ,” he ag tóg tí gé, ěprã ke ag, mīg ěn to.

⁵Goj kátá mīg ěn vỹ vĩ vẽnhmỹ han jē nĩ. A vỹ tỹ tóg Topē kato vãsãn mû. Kysã tỹ 42 (ke) ki tóg tar jē nĩ, vẽn kar kri. ⁶Kỹ tóg Topē to vĩ kónãn mû, Topē jygy to ke gé, ti jo in to ke gé, kanhkã tân kar ag to tóg vĩ kónãn mû gé. ⁷Kỹ tóg Topē tỹ ùn kuprêg mû ag kăgtén to vãsãn mû gé, kỹ tóg ag tỹ hẽn ri ke mû gé sir, goj tân tỹ mīg ěn ti. Hã ra Topē tóg ver ti to fen nĩ. Kỹ povo kar ag, nação kar ag, pã'i krēm ke kar ag, ù tỹ vyr mỹ vĩ nỹti ěn ag kar vỹ mīg ěn vĩ hã jēmêg mû. ⁸Ēprã ke kar ag vỹ ti to: “Topē vē,” he' he tí. Ag jãvo ù ag jygi tóg ránrán kỹ nỹti, Topē livron ki. Ū tỹ rĩr krỹg ja tũ vẽn ke mû ěn ag vỹ ki ránrán kỹ nỹti. Topē tỹ nén ù kar han ke to hã tóg ag jygi ránrán ja nĩgtĩ, livro ěn ki. Cordeiro tỹ ag jagfy ter ja ěn tũ vē, livro ěn ti. Ū tỹ ki ránrán kỹ nỹti ag vỹ mīg ěn jykre han tũ nĩgtĩ.

⁹Ūn nĩgrêg nỹti ag tỹ tỹ jēmē jé. ¹⁰Topē tỹ ã ki ge kỹ nỹti ù ag to: “nĩgfénh kỹ ag nỹtĩnh mû, isugrĩn,” hen kỹ ag tóg nĩgfénh kỹ nỹtĩnh mû, cadeia ki. Ti tỹ ag to: “rógro tỹ ag tóg ag kăgtén ke mû,” hen kỹ ag tóg rógro tỹ ag kăgtén ke mû sir. Ū tỹ Topē mỹ vẽn vin mû ěn ag jé to krónh ke tũg, ag jé Topē tovãnh tũg.

¹¹Kỹ sóg mīg ù vég mû gé. Ga kátá tóg kăkutē mû. Nĩka régre ti nĩ, cordeiro nĩka ri ke. Ti vĩ tóg hã ra mīg fēr ěn vĩ ri ke nĩ. ¹²Goj kátá mīg ěn rĩnve tóg ã tỹ han mû kar hyn han tí, ã jykre tar ěn ti, ga kátá mīg ti. Kỹ tóg ěprã ke kar ag to vãsãn mû, ag tỹ goj kátá mīg ěn to: “Topē vē,” he jé, ùn ter kren mû ěn to. ¹³Ga kátá mīg tag vỹ nén ve vãnh tỹ hẽn ri ke hyn han mû. Pĩ tỹ kanhkã tá kátère han tóg tí, ěprã ke kar ag rĩnve. ¹⁴Ti tỹ ěg tỹ nén han vãnh tỹ hẽn ri ke hyn han kỹ tóg ěprã ke kar mỹ ón mû, ag tỹ ti kamêg jé. Goj kátá mīg ěn rĩnve tóg milagre tỹ hẽn ri ke hyn han mû. Kỹ tóg ěprã ke ag mỹ ke mû, ag tỹ goj kátá mīg kăggrã han jé. Ag tỹ mīg ěn fynh mû ra tóg ter ja tũ nĩ, hã kỹ tóg vẽn kar mỹ: “ha ti kăggran,” he mû, ga kátá mīg ěn ti. ¹⁵Kỹ tóg goj kátá mīg kăggrã ki hu he mû, kỹ tóg rĩr mû, ti kăggrã ti, kỹ tóg vĩ mû gé. Kỹ tóg ù tỹ ti to: “Topē vē,” he jãvãnh ěn ag kăgtén kãn mû sir, ti kăggrã rĩr jē ěn ti. ¹⁶Ga kátá mīg ěn tóg tỹ ěprã ke kar ag kri ke nĩ, ùn mág ag kri, ùn kãsir ag kri ke gé, ùn rico ag kri ke gé, ùn jagãgtar ag kri ke gé, ù tỹ tỹ camarada nỹti ag kri ke gé, ag patrão ag kri ke

gé. Kĩ tóg ag kar to vāsān mū, ag tỹ ājag pēgja tá ājag nīgē pānī ki ti jiji ránrán jé, ke tū nī kỹ ti número ti. Ājag kakā ki ag tóg ti jyjy ránrán mū gé. ¹⁷Ũ tỹ gen kỹ ránrán kỹ nỹtī ag hā tóg nén ũ comprar he tĩ, nén ũ vender he tĩ gé inhā. Ũn rá tũ ag vỹ nén ũ comprar he mǎn ke tũ nỹtī ha. Vēnh rá tag vỹ tỹ ga kátá mīg ěn jyjy nĩ, ke tũ nĩn kỹ ti número ti. Ti número vỹ ti jiji tó ti gé.

¹⁸Ũn krī há ag hā tóg ti número to jykrén há han ke mū. Ũn krī tũ ěn ag pi(jé) to jykrén ke mū', ti número to. Ēprā ke jyjy vē, ti número ti, hā vỹ: 666, he mū.

Ũn krenkren kỹ nỹtī ag jān

14 ¹Kỹ sóg ki ěvānh kỹ cordeiro ěn ve mǎn mū. Pānónh kri tóg jē nĩ, pānónh tỹ Siāo he mū ěn kri, cordeiro ěn ti. Ũn e ag tóg ti mré tá nỹtī, ũ tỹ 144 mil (ke) ag. Cordeiro ěn jyjy tóg ag kakā ki rán kỹ nĩ, ũ tỹ ti mré tá nỹtī ag kakā ki. Cordeiro ěn jóg jiji vỹ ag ki rán kỹ nĩ gé. ²Kỹ sóg kanhkā tá nén ũ mēg mū. Tỹ tóg sa krog mē tĩ, tỹ tóg ta tỹ tỹrỹr he ri ke tĩ gé. Kỹ tóg tỹ ag tỹ vākyn jafā tỹ harpa kyn ěn ri ke tĩ gé, ti kyr ti. ³Vējān tǎg tó ag tóg mū gé, nén nē tỹ 4 (ke) ěn ag rĩnve, kófa ag rĩnve ke gé, nĩgja sínvĩ ěn tá. Ũ tỹ 144 mil (ke) ag vỹ Topē jé tǎg tag tó há nỹtī, ěn ag tǎvĩ. Ēprā ke ja ag vē, hā ra ag tóg krenkren kỹ nỹtī, ũ tỹ ti jān tǎg tó mū ěn ag. ⁴Jānhkri ag nỹtī. Ag pi(jé) fag vóg ja nĩgtĩ', cordeiro mré mū ja ag tóg nĩgtĩ, ag tỹ tỹ ěprā ke ra. Ēprā ke ag kāmĩ tóg ag kygjam ja nĩ, cordeiro ti. Kỹ ag tóg tỹ Topē tũ nỹtī, cordeiro tũ ke gé. Ag mỹ ag tóg há pē nỹtī. ⁵Ag pi(jé) ũ mỹ ón ja nĩgtĩ'. Kynē ja tũ pē ag tóg nĩgtĩ.

Topē tỹ jēnē jafā tǎgtũ ag

⁶Kỹ sóg Topē tỹ jēnē jafā ũ vэг mū gé. Kanhkā krēm tóg tē tĩ mū. Kỹ tóg Topē vĩ ma kǎtĩ mū, Topē vĩ ěn vỹ tũg' henh ke tũ nĩ. Ti tỹ ěprā ke kar ag mỹ Topē vĩ tónh ke vē, nação kar ag mỹ, povo kar mỹ ke gé, pǎli krēm ke kar ag mỹ, vyr mỹ vĩ nỹtī kar ag mỹ ke gé. ⁷Kỹ tóg prēr mū sir. “Topē hā kamēg nĩ, ti hā to: ũn mág vỹ tỹ ti nĩ, hemnĩ,” he tóg, Topē tỹ jēnē jafā ěn ti. “Ti kurā vỹ hur jun. Ēprā ke ag jykre tugnỹm jé tóg ke mū ha. Ũ tỹ kanhkā han mū mỹ: “Topē vỹ tỹ ā nĩ,” hemnĩ, ũ tỹ ga han mū ěn mỹ, ũ tỹ goj han mū ěn mỹ, goj nĩhỹg mré hā. ěn hā mỹ: “Topē vỹ tỹ ā nĩ,” hemnĩ,” he tóg, Topē tỹ jēnē jafā ěn ti.

⁸Ti nón Topē tỹ jēnē jafā ũ tóg jun mū gé, kỹ tóg: “kókén kỹ tóg nỹ nĩ,” he mū. “Cidade tỹ Babilônia vỹ kókén kỹ nỹ ha,” he tóg. “Ēprā ke kar to tóg vāsān ja nĩ, Babilônia to pǎli ti, ag tỹ ti mré ājag prũ tũ fag mré nỹgnỹ jé, fag tỹ ti ri ke ājag mén tũ ag mré nỹgnỹ jé, kỹ tóg vēnh kar tỹ ti mré vinho fa pē kron ri ke nĩ,” he tóg, Topē tỹ jēnē jafā ũ ěn ti.

⁹Kỹ Topē tỹ jēnē jafā ũ tóg ag nón kǎtĩ mū gé. ěn vỹ prēr kỹ: “!..ěprā ke ũ ag tóg mīg to: topē vē, he ja nĩgte..!” he mū, prēr kỹ. “!..Ti kǎggrá to ag tóg: topē vē, he ja nĩgte..! Ājag kakā ki ag tóg ti rá han ja nĩgte..! Ag nīgē pānī ki ag tóg ránrán kỹ nỹtī gé..! ¹⁰ěn ag vỹ Topē tỹ ag to jũ jagy han venh ke mū ha..! Kỹ tóg ag tỹ vinho kron ri ke nỹ nĩ ha..! Topē vỹ jũ jagy han kỹ jē ha..! Kỹ ti tỹ ag to

jūnh ke tóg kar k̄y n̄y ha..! K̄y tóg ěg t̄y vinho t̄y copo fān k̄y fĕg ěn ri ke n̄i ha..! ti t̄y ag to jūnh ke ti..! Topĕ t̄y vĕnh k̄n k̄y jĕ to ken h̄a vĕ..! Ũ t̄y m̄ig to: topĕ vĕ, he ja ěn ag v̄y jagāgtar mág venh ke m̄u ha..! cordeiro r̄inve..! Topĕ t̄y jĕgnĕ jafā ag kar r̄inve ag jagtar k̄n k̄y n̄yti ha..! P̄i ki ag tóg jagāgtar ke m̄u ha..! pó t̄y enxofre p̄ur n̄ija ki ke gé, vān p̄ur n̄ija ri ke ěn ki..! ¹¹Ag t̄y p̄i ki jagāgtar m̄u ěn n̄ija tóg kanhkā to tāp̄ry m̄u ha..! Tūg' henh ke tū ti n̄i, p̄i ěn ti..! Ũ t̄y m̄ig to: topĕ vĕ, he m̄u ěn ag v̄y vĕnhkánkán ke tū pĕ n̄i..! ũ t̄y ti k̄aggrá to: topĕ vĕ, he m̄u ěn ag kar ti..! ũ t̄y ti jyjy t̄y ránrán k̄y n̄yti ěn ag kar ti..! Vĕnhkán ke tū ag n̄yti ha..! kurā ki, kuty mrĕ h̄a..!" he tóg, prĕr k̄y, Topĕ t̄y jĕnĕ jafā ũ ěn ti.

¹²Ũ t̄y Topĕ ki ge k̄y n̄yti ag jĕ ti to krónh ke tūg, ag jĕ Topĕ tovānh tūg, ũ t̄y Topĕ v̄i kri fig m̄u ag, ũ t̄y Jesus to tar n̄yti ag.

¹³K̄y sóg kanhkā tá vĕnh v̄i ũ mĕg m̄u gé. K̄y tóg: "tag rán n̄i, ha mĕ," he m̄u, ũ t̄y kanhkā tá v̄i m̄u ti. "Ũ tóg ěg Senhor ki ge k̄y n̄yti, gen k̄y ag tóg k̄agter ja n̄i. Ěn ag m̄y tóg sér tāvi t̄i ha," he tóg, ũ t̄y kanhkā tá v̄i m̄u ti. K̄y Topĕ kupr̄ig tóg: "h̄y," he m̄u gé. "Ag rānhraj kaja vég ag tóg m̄ugt̄i, k̄y ag tóg ag rānhraj to vĕnhkán k̄y n̄yti ha," he tóg, Topĕ kupr̄ig ti, ũn k̄agter m̄u ag to, ũ t̄y ěg Senhor ki ge k̄y n̄yti ag to.

Topĕ t̄y jĕnĕ jafā ag t̄y ěprā ke ag vóg kónān

¹⁴K̄y sóg kanhkā góg kupri vég m̄u gé sir. Ũ tóg kanhkā góg ěn kri n̄i n̄i, t̄y tóg ěprā ke n̄i ve n̄i. Hā ra tóg kr̄i tógf̄i t̄y ouro n̄i n̄i, k̄y tóg ěg t̄y t̄y trigo kre jafā vyn k̄y n̄i n̄i gé. Jukén k̄y tóg n̄y, trigo kre jafā ěn ti. ¹⁵K̄y Topĕ t̄y jĕnĕ jafā ũ tóg k̄ati m̄u gé, Topĕ jo ĩn k̄atá. K̄y tóg ũ t̄y kanhkā góg kri n̄i ěn m̄y: "trigo kre jafā t̄y krenh t̄ig n̄i," he m̄u. "T̄y ti krenh ke kurā vĕ. Vĕnh k̄n k̄y ag n̄yti n̄i, ěprā ke ag," he tóg. ¹⁶K̄y ũ t̄y kanhkā góg kri n̄i ěn tóg trigo kre jafā ěn t̄y krenh t̄i m̄u.

¹⁷K̄y sóg Topĕ t̄y jĕnĕ jafā ũ vég m̄u gé. Topĕ jo ĩn k̄atá tóg k̄akutĕ m̄u. Uva kre jafā vyn k̄y tóg tá k̄akutĕ m̄u. ¹⁸K̄y Topĕ t̄y jĕnĕ jafā ũ tóg jun m̄an m̄u gé. Topĕ jo ĩn k̄atá tóg k̄akutĕ m̄u gé, Topĕ m̄y nĕn ũ p̄un jafā ěn tá. Topĕ t̄y jĕnĕ jafā tag v̄y p̄i ki r̄ir t̄igt̄i. K̄y tóg ũ t̄y uva kre jafā v̄ag m̄u ěn m̄y: "uva kre jafā t̄y krenh t̄ig," he m̄u. "Ga kri ti n̄yti, uva kanĕ ti. Ěn krenh t̄ig. Rā há ti n̄yti ha," he tóg. ¹⁹K̄y tóg t̄i m̄u, Topĕ t̄y jĕnĕ jafā ěn ti. Uva kanĕ krĕg tóg m̄u sir. K̄y tóg uva jĕgm̄i jafā ki ag vām m̄u, h̄a v̄y: Topĕ t̄y vĕnh kar to jū, he m̄u, h̄a v̄y: uva jĕgm̄i jafā, he m̄u. ²⁰Cidade fyr tá tóg jĕ n̄i, uva jĕgm̄i jafā ěn ti, k̄y ag tóg uva jĕgm̄ig m̄u sir, Topĕ t̄y jĕnĕ jafā ěn ag. K̄y ag tóg tá ag kyvĕnh kujĕg m̄u, ěprā ke ag kyvĕnh ti, k̄y tóg tāra t̄i m̄u, 300 (ke) quilômetros ra, ag kyvĕnh ti. T̄y tóg goj mág n̄y ve n̄i, ag kyvĕnh ti. Cavalu t̄y k̄a jĕ ra tóg pun kenh ke m̄u vĕ.

Topĕ t̄y jĕnĕ jafā ag t̄y ěprā ke ag vóg kónān m̄an

15 ¹K̄y sóg kanhkā tá nĕn ũ vég m̄u gé. Inh m̄y tóg e t̄i, is̄y nĕn nĕ ěn ve k̄y, k̄y tóg inh kanĕ jun m̄u. Topĕ t̄y jĕnĕ jafā t̄y 7 (ke) ag vigve inh. Ga kri ke ag vóg kónān jĕ ag tóg ke m̄u, vógvóg t̄y 7 (ke) ki. Ag t̄y ga kri ke ag vóg kónān kar k̄y Topĕ tóg jū m̄an ke tū n̄i ha. ²K̄y sóg goj t̄y vidro k̄aki p̄i gru vég m̄u. K̄y

sóg ũ ag vigvég mũ gé, ũ tỹ mĩg ěn kato vāsānsān mũ ěn ag. Ag pi(jé) ājag tỹ tỹ ěprā ke nỹti ra mĩg kāggrā ěn to há nỹti ja nĩgtĩ, ag pi(jé) vĕnh ki ti número rán ja nĩgtĩ, ti jyjy ti. Ag pi(jé) mĩg vĩ kri nĩm ja nĩgtĩ. Hā kỹ ag vỹ goj tỹ vidro jo nỹti, kỹ ag tóg vākyn jafā tỹ harpa vyn kỹ nỹti nĩ, Topē tỹ ag mỹ harpa vin mũ ěn. ³Kỹ ag tóg Topē mỹ rānhrāj ti tỹ Moisés tỹ jé ěn tó mũ, ti tỹ jān ti. Cordeiro ěn mỹ ag tóg jān mũ, ha mē: “Topē kósin vỹ tỹ ā nĩ, pā'i mág vỹ tỹ ā nĩ, vĕnh kar kri ke vỹ tỹ ā nĩ,” he ag tóg mũ, cordeiro mỹ, jān kỹ. “Nén ũ há tāvi han ja ā tóg nĩ, ge ve ja tũ ěg tóg nỹti. Ā jykre vỹ kuryj tāvi nỹ, ki hā tó ā tóg tĩgtĩ. Povo kar kri ā tóg jē nĩ. ⁴Vĕnh kar ag vỹ ā kamĕg tĩ, pā'i mág kar ag. Vĕnh kar ag vỹ ā jiji to: “ũn mág vỹ tỹ ti nĩ,” he ti. Ā hā ne ā pir mỹ há nĩ. Povo kar tóg ā tá junjun ke mũ, kỹ ag tóg ā mỹ: “Topē vỹ tỹ ā nĩ,” hĕnh ke mũ. Ā jykre kuryj ěn ve kān jé ag tóg ke mũ, povo kar ag,” he ag tóg mũ, jānjān kỹ, ũ tỹ mĩg kato vāsānsān mũ ěn ag.

⁵Kar kỹ sóg kanhkā tá Topē jo ĩn vég mũ. Ti jānkā nón ag tóg mũ, kur tỹ ĩn ěn róm kỹ, Topē nĩg jafā ěn. ⁶Kỹ Topē tỹ jĕgnĕ jafā tỹ 7 (ke) ěn ag tóg tá kapa mũ, ũ tỹ ga vóg kónān ke mũ ěn ag. Kur kupri jānhkri rĩnh kỹ ag tóg kāmũ mũ, pyrfé tỹ kur rĩnh kỹ, kỹ ag tóg ouro tỹ vĕsógfĩn kỹ nỹti gé, ājag fe kri. ⁷Kỹ nĕn nē tỹ 4 (ke) ěn ag kāmĩ ũ tóg ag mỹ ouro tỹ pĕnky junjun mũ, Topē tỹ jĕgnĕ tỹ 7 (ke) ěn ag mỹ. Pĕnky tỹ 7 (ke) junjun ag tóg mũ, ag mỹ. Fór ti nỹti, pĕnky ti, Topē jũ tỹ. Topē vỹ tũ' hĕnh ke tũ pē nĩ. Ti jũ tỹ tóg fór nỹti, pĕnky ti. ⁸Kỹ Topē jo ĩn ěn krĕm tóg nĩja nĩ. Topē tá tóg tũmtũm ke kāti mũ, nĩja ěn ti, Topē tỹ tỹ ũn mág nĩn kỹ, ti tar nĩn kỹ. Topē tỹ jĕgnĕ jafā tỹ 7 (ke) ěn ag tỹ ga vóg kónān ke to hā ũ tóg Topē jo ĩn ěn kára rānh ke tũ nĩ.

Topē jũ

16 ¹Kỹ sóg vĕnh vĩ ũ jĕmĕg mũ, Topē jo ĩn ěn kátá. Topē tỹ jĕgnĕ jafā tỹ 7 (ke) ěn mỹ tóg vĩ mũ, ũn vĩ mũ ěn ti, kỹ tóg: “pĕnky tỹ funfór ěn tỹ ga kri kugjĕn mũjĕg,” he mũ.

²Kỹ Topē tỹ jĕnĕ jafā ũ tóg tĩ mũ, ti pĕnky ki nĩ ěn tỹ ga kri kujĕn jé. Kỹ ũ tỹ mĩg ěn jiji tỹ ránrán kỹ nỹti ěn ag kar vỹ fugfóm jagy han mũ, kaga jagy. ũ tỹ mĩg kāggrā to: “Topē vỹ tỹ ti nĩ,” he mũ ag kar vỹ fugfóm kān mũ.

³Kỹ Topē tỹ jĕnĕ jafā ũ tóg goj kafā tũ ki ā pĕnky ki nĩ ěn kujĕg mũ gé. Kỹ goj tóg vĕnh kyvĕnh ri ke nĩ ha, ag tỹ ũ tānh mũ kyvĕnh ěn ri ke. Kỹ goj kāmĩ mũ kar ag vỹ kāgter mũ ha.

⁴Kỹ Topē tỹ jĕnĕ jafā ũ tóg ā pĕnky ki nĩ ěn kujĕg mũ gé, pĕnky tāgtũ vĕ sir. Goj mág mré goj kāsir kar ki tóg kujĕg mũ, ti tũ ti, goj nihỹg kar ki ke gé. Kỹ tóg vĕnh kyvĕnh kar nỹti ha, goj kar ti. ⁵Kỹ ũ tỹ goj ki rĩr tĩ ěn tóg: “ũn há vỹ tỹ ā nĩ,” he mũ, Topē mỹ. “Vāsỹ ā tóg nĩ ja nĩgtĩ, kỹ ā tóg ũri nĩ nĩ gé,” he tóg mũ, Topē mỹ. “Vĕnh jykre há han kỹ ā tóg nĩ nĩ. ⁶Ũ tỹ ā ki ge kỹ nỹti ag kāgtĕn ag tóg, ũ tỹ ā vĩ tó tĩ ag mré hā. Kỹ ā tóg ag mỹ vĕnh kato vĕnh kyvĕnh nĩm mũ sir, ag tỹ kron jé. Ag tỹ ag tỹ ag kāgtĕn kajām hā vĕ,” he tóg, Topē mỹ, Topē tỹ jĕnĕ jafā ti.

⁷Kỹ sóg vĕnh vĩ ũ jĕmĕg mũ gé. Topē mỹ nĕn ũ pũn jafā tá tóg vĩ mũ, ũn vĩ mũ ti, kỹ tóg: “Topē vỹ tỹ ā nĩ, pā'i vỹ tỹ ā nĩ, vĕnh kar kri ke vỹ tỹ

ã nĩ,” he mũ. “Kuryj ti nĩ, ã jykre ti, kÿ ã tóg ki hã tó tĩ, kÿ ã tóg ki hã ag vóg kónãn tĩ gé,” he tóg mũ, ùn vĩ mũ ên ti.

⁸Kÿ Topê tÿ jënë jafã ù tóg ã pénky ki nĩ ên kujêg mũ gé. Pénky tÿ 4 (ke) vë sir. Rã ki tóg ã tũ kujêg mũ. Kÿ rã tóg vënh kar kri hupũn jagy han mũ, kÿ ag jagtar mũ. ⁹Kÿ ag tóg kugpũr mũ sir, vënh kar, rÿ jagy tÿ. Kÿ ag tóg Topê to vĩ kónãn mũ sir, ti tÿ ag vóg kónãn tigrĩn. Ge ra ag tóg ãjag jykre tovãnh sór tũ nÿtĩ, Topê mÿ ag tóg vënh vin sór tũ nÿtĩ.

¹⁰Kÿ Topê tÿ jënë jafã ù tóg ã tũ kujêg mũ gé. Pénky tÿ 5 (ke) vë sir. Mĩg ên nĩgja kri tóg ã tũ kujêg mũ. Kÿ tóg kuty nÿ, mĩg ên krêm ke kar ag mÿ. Kÿ tóg vënh kar mÿ e tãvĩ tĩ. Kaga jagy han ag tóg mũ, ag fugfóm to. ãjag kaga jagy tigrĩn ag tóg ãjag nũnê kÿprãg mũ. ¹¹Kÿ ag tóg Topê tÿ kanhkã tá nĩ ên mÿ vĩ kónãn mũ, ag kaga to, ag tÿ ti jagy vëg mũ kar to. Ge ra ag tóg ãjag jykre kórég tovãnh sór tũ nÿtĩ.

¹²Kÿ Topê tÿ jënë jafã ù tóg ã tũ kujêg mũ gé. Pénky tÿ 6 (ke) vë sir. Goj tÿ Eufates ki tóg ã tũ kujêg mũ. Kÿ tóg tóg kãn mũ, goj tÿ Eufates ti. Hã kÿ pã'i tÿ rã jur ja tá kãmũ ên ag tóg kãmũ mũ ha, kÿ goj tóg ja ên vÿ tÿ ag japry nÿ ha, ag jamĩn. ¹³Kÿ sóg vënh kuprĩg tãgtũ vëg mũ, hã ra tóg tÿ pépo ve nÿtĩ, vënh kuprĩg ag. Û tóg mĩg fër ên jënkã tá kãkutê mũ, ù tóg goj kãtã mĩg ên jënkã tá kãkutê mũ, ù tóg ón kÿ Topê vĩ tó tĩ ên jënkã tá kãkutê mũ gé. ¹⁴Japo ag vë, vënh kuprĩg tÿ tÿ pépo nÿtĩ ve ên ag, hã ra ag tóg êg tÿ nén han vãnh hyn han mũ. Kÿ ag tóg êprã ke to pã'i kar ag mré vëmén mũ gé, ag tÿ vënh génh ke to vënh mãn jé, Topê tÿ ag mÿ kurã nĩv ên ki. Topê hã ne tÿ ùn mág nĩ!

¹⁵“Ha vé, ãjag tÿ nén ù péju(g) tĩ ên kãtĩg ri ke ti nĩnh mũ, inh kãtĩg mãn ke ti. ãjag nũgnũr tũ nÿtĩn kÿ tóg há tĩ, ãjag kur kynkar kÿ nÿtĩn kÿ tóg há tĩ. Kÿ mÿ sér nÿtĩmnĩ. Kÿ ãjag tóg kator nÿtĩnh ke tũ nĩ. Mÿ'ãg'ãg ke tũ ãjag nÿtĩ, ù ag tÿ ãjag vëg mũ ra,” he tóg, êg Senhor ti, êg mÿ.

¹⁶Japo tag ag vÿ pã'i kar tÿ vënh mãn han mũ, êmã tÿ Armagedom tá, Hebreu vĩ ki êmã ên jÿjy vë.

¹⁷Kÿ Topê tÿ jënë jafã ù tóg ã tũ kujêg mũ gé. Pénky tÿ 7 (ke) hã vë. Kanhkã krêm tóg ã tũ kujêg mũ. Kÿ nĩgja sínvĩ ên tá, Topê jo ìn kãkã nĩgja ên tá vënh vĩ tóg mē há ti, kÿ tóg: “nén kar tóg kar kãn kÿ nÿ ha,” he mũ, vënh vĩ ti. ¹⁸Kÿ ta tóg kómkóm ke mũ, tÿrÿr he tóg mũ gé, kÿ ga vÿ ragra ke jagy han mũ gé. Ga tÿ ragra ke tÿ ge ve ja tũ êg tóg nÿtĩ. Êg tÿ ga mĩ mũn kã tóg ragra ke tÿ ge han ja tũ nĩ. ¹⁹Cidade mág ên tóg vënh kãpów kÿ nÿ ha, vënh kãpów tãgtũ tÿ. Kÿ ga kar mĩ cidade tóg kókén kÿ nÿtĩ nĩ. Topê pi(jé) cidade tÿ Babilônia kã jatu ja nĩgtĩ!. Cidade ên ki ke ag to tóg jũ tãvĩ han mũ, Topê ti, ag to tóg fe gÿv han mũ. Hã kÿ tóg ag vóg kónãn jagy han mũ, kÿ tóg êg tÿ vinho kron ri ke nĩ. ²⁰Kÿ goj vãso kar tóg tũ nÿtĩ ha ke gé, pãnónh kar tóg tũ nÿtĩ gé. ²¹Kÿ nãfy tóg vár mũ gé. Éhé tãvĩ ti nĩ, nãfy ên ti, ùn pir tóg quilo tÿ hën ri ke nĩ, kukryr tÿ nãfy ên. Êprã tóg vár mũ. Kÿ êprã ke ag tóg Topê mÿ vĩ kónãn mũ gé sir, nãfy tag to, ti jagy tãvĩ nĩn kÿ.

Ūn týtá kórég fi

17 ¹Kỹ Topê týt jênê jafã ù tóg inh ki jun mũ, ù týt pénky măn mũ ja ên ag kã ù. Kỹ tóg inh mýt: “kunĩg,” he mũ. “Nhỹ ã mýt cidade mág ti ven, cidade týt goj týt hên ri ke tá nỹ ên ti. Cidade ên ki ke ag vỹ ùn mén (ka)mẽ fi ri ke nýtĩ, kỹ Topê vỹ ag vóg kónãn ke mũ, ùn mén (ka)mẽ fi ri ke ên ag. ²Pã'i kar vỹ fi mré nỹ ja nĩgtĩ, ùn mén (ka)mẽ ên fi mré. Êprã ke kar mýt tóg sér tĩ, fi jykre ti, kỹ tóg ag týt kronkron kỹ kãgter ri ke nĩ, ag týt ùn mén (ka)mẽ ên fi mré nỹ ti,” he tóg inh mýt, Topê týt jênê jafã ti.

³Kỹ Topê kuprĩg tóg inh krĩn mũ, kỹ sóg nén nê ve kỹ ga kórég ra tĩ mũ. Topê týt jênê jafã ên vỹ inh pére tĩ mũ. Tá ùn týtã fi tóg nĩ nĩ. Fi mæg týt mĩg kri fi tóg nĩ nĩ, hã ra tóg kusũg jê, fi mæg ti. Vênh jygi tóg fi mæg kri ránrán kỹ nýtĩ, kỹ tóg vênh kri týt rũm ke kỹ jê, vênh jygy rágrã týt. Vênh jygy ên tóg Topê to vĩ kónãn kỹ nýtĩ. Fi mæg vỹ ã pir ra krĩ týt 7 (ke) nĩ, nĩka týt 10 (ke) ti nĩ gé. ⁴Ūn týtã ên fi vỹ kur kusũg tu kỹ nĩ nĩ, kur kósóg pê. Ouro tu fi tóg nĩ gé, pó sínvi, pérola. Ouro týt copo măn kỹ fi tóg nĩ nĩ. Hã ra tóg nén ù kórég kar týt fôr jê, nén ù kavéj kar týt, copo ti. Fi týt vênh jykre pãno han mũ to ken hã vê. ⁵Fi jiji vỹ fi kakã ki rán kỹ nĩ, ù tóg ã vĩ ki fi jygy tag mê ja tũ nĩ ver. Hã ra tóg: “Babilônia hã vê,” he mũ, fi jiji ti. “Ūn mág vỹ týt inh nĩ,” he tóg. “Ūn mén (ka)mẽ kar fag mýnh vỹ týt inh nĩ, ù týt nén ù kavéj kar han tĩ ag mýnh vỹ týt inh nĩ, êprã, ag týt inh jykre han kỹ,” he tóg mũ, fi jygy ti. ⁶Hã ra fi tóg kron kỹ ter nĩ, fi týt ù týt Topê ki ge kỹ nýtĩ ag kyvênh kron kỹ. Ū týt hên ri ke ag kãgtén ja ag tóg nĩgtĩ, Jesus tugrĩn, ag týt Jesus tovãnh sór tũ tugrĩn, hã ra fi tóg ag kyvênh kron kãn ja nĩ.

Inh mýt tóg e tĩ, sỹ fi ve kỹ. ⁷Kỹ Topê týt jênê jafã tóg inh mýt: “mýt ã mýt e?” he mũ. “Nhỹ ã mýt fi kãmén, fi mæg týt mĩg ti ke gé, fi mæg krĩ týt 7 (ke) ên, fi mæg nĩka týt 10 (ke) ên, fi týt kri nĩ jafã ên ti,” he tóg, Topê týt jênê jafã ti. ⁸“Fi mæg tag vỹ vãsỹ jê ja nĩgtĩ. Ūri tóg ki tũ nĩ, hã ra tóg kãnhmar nũgme tá kãkutênh ke mũ, Topê týt ti kókén pê han jê. Kỹ tóg êprã ke ag mýt e tĩnh mũ, ag týt fi mæg tag venh ken kỹ, ùn jygy týt Topê livro ki rán kỹ nýtĩ tũ ag mýt. Topê týt nén (ũ) kar han to hã tóg ag rán ja tũ nĩ, kỹ ag tóg rĩnrĩr ke tũ nýtĩ. Ên ag mýt tóg e tĩnh mũ, ag týt fi mæg týt mĩg ven kỹ. Vãsỹ tóg nĩ ja nĩgtĩ, kỹ tóg ver ki tũ nĩ, hã ra tóg kejên kãtig mãn ke mũ ha.

⁹Topê týt ùn kanhrãn mũ ên ag hã vỹ fi mæg to jykren ke mũ. Ti krĩ týt 7 (ke) vỹ týt pãnónh týt 7 (ke) nýtĩ. Pãnónh ên kri fi tóg nĩ nĩ, ùn týtã kórég ên fi. Pã'i týt 7 (ke) to ke vê gé, hã ra, ti krĩ týt 7 (ke) ên ti. ¹⁰Pã'i týt 5 (ke) vỹ hur tũg, ùn pir vỹ ũri nĩ nĩ, ùn pir ù vỹ kar kỹ kãtig ke mũ gé. Ti kãtig ken kỹ tóg nĩg sĩ pê han ke mũ, ù týt êgno ên ti. ¹¹Fi mæg tag, ù týt vãsỹ nĩ ja kar kỹ ũri kã nĩ tũ ên vỹ týt pã'i ù nĩ gé. Pã'i týt 8 he mũ vỹ týt ti nĩ. Pã'i týt 7 (ke) ên mré ke vỹ týt ti nĩ gé. Topê vỹ ti týt tũ! henh ke mũ gé.

¹²Ti nĩka týt 10 (ke) vỹ týt pã'i týt 10 (ke) nýtĩ gé. Ên ag vỹ ver kãmũ tũ nýtĩ. Fi mæg mré ag tóg týt pã'i nýtĩnh ke mũ, hã ra ag tóg nĩg sĩ pê han ke mũ gé. ¹³Jagnê mré ag tóg vênh jykre pir han ke mũ, pã'i tag ag, fi mæg ên mré. Fi mæg mýt ag tóg vênh vin ke mũ. ¹⁴Cordeiro ên kato ag tóg vãsãnsãn ke mũ.

Hã ra cordeiro tóg ag tỹ hên ri kenh ke mũ, ti mré ke ag mré, ù tỹ ti tovãnh ja tũ ag mré, ùn kuprêg kỹ nỹti ag mré. Kỹ cordeiro ên vỹ tỹ pã'i kar kri ke jê. Pã'i mág ag kar kri tỹ pã'i ti jê mỹr," he tóg inh mỹ, Topê tỹ jênê jafã ti.

¹⁵Kỹ tóg inh mỹ: "goj ve ja ã nĩ gé," he mũ. "Goj ên tá fi tóg nĩ, ùn týtã kórég ên fi. Povo kar to ken hã vê, hã vỹ: goj, he mũ, êprã ke kar to ken hã vê, nação kar to ken hã vê, vurmỹ vĩ nỹti ag kar to ken hã vê gé, hã vỹ: goj, he mũ," he tóg. ¹⁶"Kỹ fi mễg vỹ ti nĩka tỹ 10 (ke) ên mré (tóg) fi to kórég tãvi nỹtinh ke mũ. Fi tũ kunũnh kãn jé ag tóg ke mũ, fi kur mré hã, kỹ fi tóg kator nĩnh ke mũ, ùn kórég ên fi. Fi nĩ ko jé ag tóg ke mũ gé, kỹ ag tóg fi pũn ke mũ gé. ¹⁷Ag tỹ ki kagtĩg ra Topê tóg ag krĩn ti, ag vatãnh tá, kỹ ag tóg Topê tỹ ag mỹ fi to vênh jykre niv ên hã han tí. Topê tỹ ag krĩn kỹ ag tóg jagnê mré vênh jykre pir hã han tí, kỹ ag tóg fi mễg mỹ vênh vin tí gé, pã'i tỹ 10 (ke) ên ag. Gen kỹ ag tóg nén kar kãnkãn ke mũ ên pêtêm ke mũ, Topê tỹ vãsỹ tó ja ên kar ti," he tóg, Topê tỹ jênê jafã ti.

¹⁸"Kỹ ùn týtã kórég ên fi, ã tỹ ùn vég mũ ên fi vỹ tỹ cidade mág ên nĩ. Êprã pã'i kri ke kar fi nĩ," he tóg inh mỹ, Topê tỹ jênê jafã ên ti.

Babilônia tỹ tú' he

18 ¹Kar kỹ sóg Topê tỹ jênê jafã ù vég mũ gé. Kanhkã tá tóg kãtêre mũ. Tar pê tóg jê, jêngrê tóg jê gé, kỹ ti jêngrê tóg kurã han mũ, êprã, Topê tỹ jênê jafã ên ti. ²Ên vỹ prêr mũ. "...Kókén kỹ ti nỹ ha..!" he tóg mũ, prêr kỹ. "...Babilônia vỹ kókén kỹ nỹ, cidade mág ên ti..!" he tóg. "...Japo ag, vênh jagrê kórég ag vỹ tá êmã nỹti ha..! Jêsi kavêj kar, sêsi kórég kar vỹ tá nỹti ha, cidade jy ró ên kãmĩ..! ³Êprã ke kar vỹ cidade ên jykre han ja nĩgte..! Kỹ tóg ag tỹ ù mré nỹ kónãn ên ri ke ne..! Vinho kron mág ri ke ti ne..! cidade ên jykre ti..! Êprã pã'i ag vỹ tá vênh jykre han ja nĩgte..! Kỹ tóg ùn týtã kórég fi mré nỹ ri ke nĩ, ag jykre kórég ti..! Nén ù vender he tí ag vỹ cidade ên tugrĩn rico nỹti ja nĩgte..! tá ke ag tỹ rico tãvi ja nỹtĩn kã..! Hã ra tóg kókén kỹ nỹ ha..!" he tóg, prêr kỹ, Topê tỹ jênê jafã ti.

⁴Kỹ sóg kanhkã tá vênh vỹ ù mễg mũ gé, ù tỹ Topê ki ge kỹ nỹti ag mỹ tóg: "mũ jé ha," he mũ, ù tỹ kanhkã tá vỹ mũ ên ti. "Cidade tá kãpamnĩ, ke tũ nĩ mũ ra ãjag tóg ag mré Topê vỹ mranh ke mũ, kỹ Topê tóg ag mré ãjag vóg kónãn ke mũ gé, ti tỹ cidade kókén ken kỹ," he tóg, ù tỹ kanhkã tá vỹ mũ ti, ù tỹ Topê ki ge kỹ nỹti ag mỹ. Cidade ên kókén ke to hã tóg ag mỹ tó mũ. ⁵"Topê vỹ ag jykre pãno ve kãn, kỹ tóg kã jatũ tũ nĩ. Ag tỹ Topê vỹ mranh vỹ e tãvi nỹti, kỹ ti pãnfĩ tóg kanhkã pêtêm mũ, ag tỹ Topê vỹ mranh pãnfĩ ti. ⁶Ag tỹ ãjag mỹ nén han ja ên ri ke han nĩ, ag mỹ," he tóg, ù tỹ Topê ki ge kỹ nỹti ag mỹ. "Ag tỹ ãjag mỹ ti kórég pir han kỹ ag mỹ ti kórég régre han nĩ, vênh kato. ãjag mỹ ag tóg ti kron jafã kórég ven ja nĩ. Ag mỹ ti kron jafã kórég ven régrég nĩ. ⁷Sĩnvĩ ja ag nỹti, tỹ nén ù mág ja ag nỹti. Ag jagtar han nĩ, ag sĩnvĩ tag to. Ag jagtar han nĩ, ag tỹ nén ù mág tag to, ù tỹ nén ù mág tũ ag jagtar han nĩ gé, ag mré. "Ùn mág vỹ tỹ êg nỹti," he ag tóg mũ. "Ù pi(jé) êg jagtar han ke mũ," he ag tóg mũ. ⁸Hã ra ag tóg vãhã venh ke mũ, ag jagãgtar ke ti, ag vêsyrénh ke ti, ag vãnhrãg ti, kỹ tóg ag tỹ vênh kaga jagy han ri ke nĩ sir. Kurã pir ki ag tóg tag ve kãn ke mũ, kỹ ag

tóg pī ki kǎgter ke mǔ. Topē hā vỹ ag vóg kónān ke mǔ, pā'i mág ti. Tar pē ti jē nī mǔr, Topē ti,” he tóg, ũ tỹ kanhkā tá vī mǔ ti, ũ tỹ Topē ki ge kỹ nỹti ag mỹ.

⁹Kỹ ēprā pā'i ag vỹ venh ke mǔ, cidade nīja ti. Cidade ki ke ag mré tóg ag mỹ sér nī ja nĩgtī. Ag mré ag tóg nén (ũ) kar vigve ja nĩgtī, kỹ tóg ag tỹ fag mré nỹ ri ke nī ja nĩ, ag tũ mág ěn ti. Cidade pũr nīja ve jé ag tóg ke mǔ ha, kỹ ag tóg fỹnh mǔ, jagtar ke mǔ. ¹⁰Kuvar há tá ag tóg nỹtinh ke mǔ, ag kanē jur kỹ, ag tỹ cidade ki ke ag vānhprāg jagy mē kỹ. Kỹ ag tóg jagtar kỹ: “jagy tāvī tóg ti,” henh ke mǔ sir, pā'i ag. “Éhé tāvīn ja ti nĩ, cidade tỹ Babilônia tag ti, tar pē ja ti nĩ. Hā ra ag tóg hora pir ki ti kókén kǎn,” he jé ag tóg ke mǔ, pā'i ag.

¹¹Kỹ nén (ũ) vender he nỹtĩgtī ag vỹ jagtar kỹ fỹnh ke mǔ gé, cidade tũ to. Tá ag tóg nén (ũ) tỹ hēn ri ke ve ja nĩgtī, ¹²ouro ti, prata ti, pó sīnvī ti, pérola ti, pyrfé tỹ kur ti, kur tỹ seda ti, kur kusũg ti, kur kusũg sá ti, ka kaja e ti, elefante jā tỹ nén han mǔ ti, ka sīnvī tỹ nén han mǔ ti, ferro tỹ nén han mǔ ti, ferro kusũg tỹ nén han mǔ ti, pó tỹ mármore tỹ nén han mǔ ti, ¹³canela ti, vējēn ger há ti, ka jēnjo pũn kỹ ger há tỹ incenso ti, ka jēnjo pũn kỹ ger há tỹ mirra ti, vēnh mĩ tĩn jafā ti, vinho ti, azeite ti, farinha ti, trigo ti, monh ti, carneiro ti, cavalo ti, carroça ti, ũn gré ag, ũn týtá fag mré hā. Tag kar tỹ ag tóg negocio hyn han tĩ ja nĩgtī, vender he nỹtĩgtī ag, hā ra tóg tũ tĩ ha. ¹⁴Kỹ nén ũ vender he nỹtĩgtī ag tóg jagtar kỹ tag tónh ke mǔ, ha mē. “Nén kar ve ja ěg tóg nĩgtī, cidade tá, kỹ tóg ěg mỹ sér nī ja nĩgtī. Riqueza ěn tóg tũ' he kǎn. ũ tóg nén kar ěn to ěn mǎn ke tũ nĩ ha. Ve mǎn ke tũ ěg tóg nĩ ha, nén (ũ) kar ěn ti,” he jé ag tóg ke mǔ, nén (ũ) vender he nỹtĩgtī ag. ¹⁵Kỹ ag tóg kuvar há tá nỹtinh mǔ. Cidade ěn tá negocio han to ag tóg vēnh han ja nĩgtī, hā kỹ tóg ag mỹ e ti. Tātá nỹtĩn kỹ ag tóg jũrũn ke mǔ, ag tỹ cidade tá ke ag jagǎgtar ve kỹ. Fỹ jé ag tóg ke mǔ, vēsýrēnh jé ag tóg ke mǔ. ¹⁶Kỹ ag tóg: “jagy tāvī tóg nĩ,” henh ke mǔ. “Há tāvī ja ag nỹti, cidade tag ki ke ja ag. Kur sīnvī rĩnh ja ag tóg nỹti, pyrfé tỹ kur, kur kusũg, kur kusũg sá. Ouro rĩnh ja ag tóg nỹti, pó sīnvī, pérola. ¹⁷Hora pir ki ag tóg tũ' he kǎn ja nĩ, ag tỹ nén (ũ) kar mré hā,” he jé ag tóg ke mǔ gé, nén ũ vender he nỹtĩgtī ag.

¹⁸Kỹ barco to pā'i ag vỹ nỹtinh ke mǔ gé, goj kri mǔ mǔ kar ag, barco ki rĩr ti kar ag, ũ tỹ goj kri rǎnhraj mǔ kar ag ke gé. Tātá nỹti kỹ ag tóg cidade nīja ěn ve kỹ (ag tóg) prēnprēr mǔ sir. “Cidade ěn ri ke ve mǎn ke tũ ěg tóg nĩ ha,” he jé ag tóg ke mǔ. ¹⁹Kỹ ag tóg ga funfur tỹ vēnh kri vām ke mǔ sir, ag mỹ e tĩn kỹ. Fỹ jé ag tóg ke mǔ, vēsýrēnh jé ag tóg ke mǔ. “Jagy tāvī tóg ti,” he jé ag tóg ke mǔ. “Há tāvī ja ag nỹti, cidade tag ki ke ja ag. Vēnh kar vỹ ag tũ mǎn kỹ vēnh hyn han ja nĩgtī, ũ tỹ barco kāmī goj kri mũgtī ag. Kỹ tóg jagy tāvī ti. Hora pir ki tóg tũ' he kǎn ja nĩ,” he jé ag tóg ke mǔ gé, goj kri mũgtī ag.

²⁰“Kanhkā tá nỹti kar'. Mỹ sér nỹtĩmnĩ. Topē ki ge kỹ nỹti kar', mỹ sér nỹtĩmnĩ. Apóstolo kar', Topē vī tó tĩ kar', mỹ sér nỹtĩmnĩ. Tũ' he kǎn ag huri, cidade ěn tá ke kar ag. Topē vỹ hur ag vóg kónān, ag tỹ ājag vóg kónān ja tugrĩn.”

²¹Kỹ Topē tỹ jēnē jafā tar ũ tóg pó mág vǎg mǔ. Kra tỹ pó ri ke ti nĩ, pó mág ěn ti. Kỹ tóg goj nig ki ti fón mǔ, jũ kỹ, kỹ tóg: “isỹ pó fón mǔ tag ri ke ti nĩnh mǔ,

cidade t̃y Babilônia kókén ti,” he m̃ũ. “Kókén k̃an k̃y tóg ñi. Û tóg ti ve m̃an ke tũ ñi ha, cidade ti. ²²K̃aki ag tóg harpa kyn m̃an ke tũ ñỹti ha, t̃ynh m̃an ke tũ ag ñi ha, ṽan t̃y ṽakyr ên kyn m̃an ke tũ ag ñi ha, trombeta ti ke gé. Ṽakyr m̃e m̃an ke tũ êg ñi ha, cidade t̃y Babilônia tá. Û tóg ki r̃anhr̃aj m̃an ke tũ ñi ha, ù tóg ki ñi m̃an ke tũ ñi ha. Û tóg ki tynyn m̃an ke tũ ñi gé. ²³Û tóg ki lampião grug m̃an ke tũ ñi ha. Û tóg ki ṽenh pr̃ug to festa han m̃an ke tũ ñi gé. Há t̃aṽi ja ag ñỹti, tá nén (ũ) kar vender he ñỹt̃ig̃ti ên ag, k̃y ṽenh kar ṽy ag ṽi j̃em̃e ja ñig̃ti. Povo kar kr̃in kónan ja ag tóg ñig̃ti, kujá t̃y êg m̃y ón t̃i ên ri ke han ja ag tóg ñig̃ti. ²⁴Top̃e ṽi tó t̃i ag k̃agtén ja ag tóg ñig̃ti, cidade ên tá ke ag, Top̃e ki ge k̃y ñỹti ag k̃agtén ja ag tóg ñig̃ti. Ên h̃a tá tóg ṽenh ven ja ñi, ag t̃y ùn k̃agtén m̃ũ kyṽenh kar ti. H̃a k̃y ag tóg ag kar kyṽenh kaj̃am k̃an ke m̃ũ,” he tóg m̃ũ, Top̃e t̃y j̃eñe jaf̃a tar ên ti.

19 ¹K̃y sóg kanhk̃a tá nén ù m̃eg m̃ũ gé sir, h̃a ra tóg ù t̃y h̃en ri ke ag j̃an m̃eg ñi. J̃an k̃y ag tóg cidade ên to tag tó m̃ũ, ha m̃e. “Top̃e m̃y ṽi há han ñi. Top̃e ne êg krenkren han ki kanhr̃o ñi! Ti h̃a ne t̃y ùn mág ñi! Ti h̃a ne tar j̃e! ²Ti t̃y nén han m̃ũ ṽy kuryj kar ñy. Ûn t̃ytá kórég ên fi vóg kónan tóg huri. Êpr̃a ke kar kókén ja fi tóg ñi, fi jykre p̃ano t̃y. Top̃e ṽy fi vóg kónan, fi t̃y ti r̃anhr̃aj han t̃i ag k̃agtén ja ñin k̃y,” he ag tóg, kanhk̃a t̃an ag, cidade t̃y Babilônia to.

³K̃y ag tóg j̃an m̃an k̃y tag tó m̃ũ gé, ha m̃e. “Top̃e m̃y ṽi há han ñi. Cidade ên p̃ur ñija ṽy kanhk̃a ra t̃apry m̃ũ. Tũ! henh ke tũ ti ñi, ñija ên,” he ag tóg m̃ũ gé, j̃an k̃y, kanhk̃a t̃an ên ag. ⁴K̃y kófa t̃y 24 (ke) ên ag tóg m̃ug ke k̃an m̃ũ, nén ñe t̃y 4 (ke) ên ag mr̃e h̃a. Top̃e m̃y ag tóg: “Top̃e ṽy t̃y ã ñi,” he m̃ũ, ù t̃y ñig̃ja s̃inṽi kri ñi ên m̃y. K̃y ag tóg: “h̃a ṽe,” he m̃ũ gé. “Top̃e m̃y ṽi há han ñi,” he ag tóg m̃ũ, jam̃a hár(a).

Cordeiro ṽenh pr̃ug

⁵K̃y ñig̃ja s̃inṽi ên tá ṽenh ṽi tóg m̃e há t̃i gé. “Û t̃y Top̃e m̃y r̃anhr̃aj t̃i!,” he tóg. “Û t̃y Top̃e kam̃eg t̃i!,” he tóg. “Ûn mág!,” he tóg. “Ûn k̃asir!,” he tóg. “Top̃e m̃y ṽi há han, ajag kar,” he tóg, ṽenh ṽi ên ti.

⁶K̃y sóg ù t̃y h̃en ri ke ag j̃an m̃eg m̃ũ gé. T̃y tóg sa krog ṽi m̃e t̃i, t̃y tóg ta t̃y t̃yr̃r he m̃e t̃i gé, ag j̃an ti. J̃an k̃y ag tóg tag tó m̃ũ, ha m̃e. “Top̃e m̃y ṽi há han ñi,” he ag tóg. “Û t̃y nén ù kar han ki kanhr̃o ñi ên tóg t̃y p̃a!i mág p̃e j̃e, êg p̃a!i mág ti, Top̃e ti. ⁷K̃y tóg êg m̃y sér t̃aṽi t̃i. Ṽi sér han j̃e êg tóg ke m̃ũ ha. “T̃y ti ùn mág p̃e j̃e,” he j̃e êg tóg ke m̃ũ gé. “Cordeiro t̃y ṽah̃a pr̃ug ke ñe ha. Ti pr̃unh ke fi ṽy ṽenh k̃an huri. ⁸Á kur kupri ên tu k̃y fi tóg j̃e ñi, fi kur j̃engr̃e ên,” he ag tóg, ùn e ag, j̃anj̃an k̃y. Fi jykre t̃ag to ken h̃a ṽe, h̃a ṽy: fi kur kupri j̃engr̃e, he m̃ũ, fi t̃y Top̃e jykre há ên han k̃y ñi h̃a ṽe. Û t̃y Top̃e ki ge k̃y ñỹti kar ag to ken h̃a ṽe, h̃a ṽy: cordeiro pr̃unh ke, he m̃ũ.

⁹K̃y Top̃e t̃y j̃eñe jaf̃a tóg inh m̃y: “inh ṽi tag rán ñi,” he m̃ũ. “Û t̃y h̃en ri ke ag tóg cordeiro pr̃ug t̃y festa konh ke m̃ũ. Top̃e ṽy ù t̃y ti festa ko m̃ũ ag kar ve há han m̃ũ,” he tóg. K̃y tóg: “Top̃e t̃y tón h̃a ṽe,” he m̃ũ gé. “H̃a ra Top̃e tóg ón ṽanh ñig̃ti,” he tóg, Top̃e t̃y j̃eñe jaf̃a ti.

¹⁰Kỹ sóg ti krēm mũg ke mũ, sỹ ti mỹ: “Topẽ vỹ tỹ ã nĩ,” he jé. Hã ra tóg inh mỹ: “ke tũg ra,” he mũ, Topẽ tỹ jẽnẽ jafã ên ti. “Topẽ mỹ rãnrãj han jafã vỹ tỹ inh nĩ, ã ri ke, ã kanhkã ag ri ke, ù tỹ Jesus tỹ ki hã tó mũ ki króm mũ ên ag kar ri ke sóg nĩ, Topẽ rãnrãj han kỹ,” he tóg. “Topẽ hã mỹ: Topẽ vỹ tỹ ã nĩ, hemnĩ,” he tóg inh mỹ, Topẽ tỹ jẽnẽ jafã ên ti.

Topẽ vĩ tó tĩ ag vỹ Jesus tỹ ki hã tó mũ ên hã kãmén tĩ.

Û tỹ cavalo kupri kri nĩ

¹¹Kỹ sóg kanhkã róm kỹ nỹ vég mũ. Cavalo kupri vỹ tá jẽ nĩ. Û tỹ ti kri nĩ jyjyn hã vỹ: “ùn ón vãnh,” he mũ. “Û tỹ nén (ũ) há to krónh ke vãnh,” he tóg mũ gé, ti jiji ti. Ti hã vỹ jykre kuryj nĩ, ù tỹ cavalo kupri kri nĩ ên ti, kỹ tóg ki hã tó tí gé. Nén ù há hã to tóg vãsãn ti gé. ¹²Ti kanẽ vỹ tỹ pĩ gru ve nĩ. Ti krĩ tógfĩ vỹ e nỹtĩ. Ti kri ti jyjy tóg rán kỹ nĩ, hã ra ù pí(jé) ti jiji ki kanhró nỹtĩ! Ti hã vỹ ã pir mỹ ã jyjy ki kanhró nĩ! ¹³Ti kur vỹ kvvénh nĩ. Ti to ag tóg: “Topẽ vĩ,” he tĩ. ¹⁴Kanhkã tá soldado ag tóg ti nón kãmũ mũ. Cavalo kupri kri ag tóg kãmũ mũ, kanhkã tân ag, ti soldado ag. Kur kupri rĩnh kỹ ag tóg kãmũ mũ. ¹⁵Û tỹ ag jo tĩ mũ ên jẽnã tá rógro jã régre tóg kãkutẽ mũ. Rógro tag tỹ tóg povo kar ag tỹ hẽn ri kenh ke mũ. Tỹ ag kri jẽ kỹ tóg vãnh jykre tar han ke mũ, ag to. Uva jëgmĩ jafã tá tóg jëgmĩnh ke mũ, uva ti, hã vỹ: Topẽ tỹ vãnh kar to jũ jagy han mũ, he mũ, hã vỹ: uva jëgmĩ, he mũ. ¹⁶Ti kur ki tag tóg rán kỹ nĩ, ha mẽ. “Pã'i kar ag kri pã'i,” he tóg, vãnh rán ki. “Ûn mág kar ag kri ke,” he tóg mũ gé, vãnh rán ki. Ti kre ki tóg rán kỹ nĩ gé.

¹⁷Kỹ sóg Topẽ tỹ jẽnẽ jafã ù vég mũ gé. Rã kri tóg jẽ nĩ. Kỹ tóg sēsĩ kar jé prẽr mũ, jēsĩ tỹ kanhkã krēm tẽgtẽ tí ag kar. Jamã hár(a) tóg ag mỹ: “!..kuneg..!” he mũ. “!..Vãnh mãn kãmũ jeg..!” he tóg. “!..Topẽ tỹ festa konh kãmũ jeg..!” ¹⁸Pã'i kãgter konh kãmũ jeg..! Soldado to pã'i ag, soldado ag, cavalo ag, ù tỹ cavalo kri mũgtĩ ag, ù tỹ tỹ camarada nỹtĩ ag, ag patrão ag, ùn mág ag, ùn kãsir ag, ãprã ke kar ag kãgter mũ nĩ konh kãmũ jeg..!” he tóg, Topẽ tỹ jẽnẽ jafã ti, sēsĩ ag kar jé prẽr kỹ.

¹⁹Kỹ sóg goj kãtã mĩg ên ve mãn mũ gé, ãprã pã'i kar ag ke gé, ag soldado ag mré hã. Vãnh mãn kỹ ag tóg nỹtĩ, ag tỹ ù tỹ cavalo kupri kri nĩ ên kato vãsãnsãn jé, ag tỹ ti krēm ke ag kato vãsãnsãn mág han jé. ²⁰Kỹ ag tóg mĩg ên ség mũ, ù tỹ ón kỹ Topẽ vĩ tó tĩ ên ag mré hã, ù tỹ mĩg rĩnve nén ve vãnh tỹ hẽn ri ke hyn han ja ên ti. Ti tỹ milagre hyn han tugrĩn ù tỹ hẽn ri ke ag tóg ti vĩ kri nĩm ja nĩgtĩ. Ti tỹ ag krĩn kónãn hã vẽ, ù tỹ ti rá tỹ rãnrãn kỹ nỹtĩ kar ag, ù tỹ ti kãggrã to: “Topẽ vỹ,” he mũ kar ag. Kỹ ù tỹ mĩg ên ség mũ ag tóg pĩ gru fir ki ti fón mũ, pĩ mág pẽ ki, ù tỹ ón kỹ Topẽ vĩ tó tĩ ên mré hã. Ag rĩnrĩr hã ra ag tóg pĩ grug fir ên ki ag vãm mũ, ag sigse kỹ. Pó tỹ enxofre pũr nĩja ên ki ag tóg vãm mũ, vãn pũr nĩja ri ke ên ki. ²¹Ag soldado ag kãgtén ag tóg mũ gé sir, rógro tỹ, rógro tỹ ù tỹ cavalo kupri kri nĩ ên jẽnã tá kãkutẽ mũ ên ti. Kỹ jēsĩ kar ag tóg vãnh fãn mũ sir, ùn kãgter mũ ag nĩ kon kỹ.

Satanás t̄y pr̄yg t̄y mil (ke) ki se k̄y j̄e

20 ¹K̄y sóg Topē t̄y j̄ēnē jafā ū v̄ég m̄ū gé sir. Kanhk̄ā tá tóg k̄at̄ere m̄ū, Topē t̄y j̄ēnē jafā ti. Nūgme j̄ānk̄ā n̄ífénh jafā vyn k̄y tóg k̄at̄ere m̄ū, ti chave ti. Ferro t̄y corrente v̄āg tóg m̄ū gé. ²Ēn v̄y m̄īg f̄ēr ěn s̄ég m̄ū, h̄ā v̄y: p̄yn ve t̄y ūn ve fag kr̄in kónān m̄ū, he m̄ū, h̄ā v̄y: Japo, he m̄ū, h̄ā v̄y: Satanás, he m̄ū, m̄īg f̄ēr ěn ti. Ēn se k̄y tóg ferro t̄y ti mr̄inh m̄ū sir. K̄y tóg se k̄y j̄ē n̄i, pr̄yg t̄y mil (ke) ki. ³Nūgme ki tóg ti fón m̄ū sir, m̄īg f̄ēr ti t̄y, Topē t̄y j̄ēnē jafā ěn ti, k̄y tóg nūgme j̄ānk̄ā n̄ífénh há han m̄ū sir, chave t̄y. K̄y m̄īg f̄ēr ěn tóg povo ag kr̄in kónān m̄ān ke tū n̄i ha ver, pr̄yg t̄y mil (ke) ki. Pr̄yg t̄y mil (ke) tag t̄y tū' hen k̄y ag tóg ver ti kavān s̄i han m̄ān ke m̄ū, m̄īg f̄ēr ti.

⁴K̄y sóg n̄igja s̄inv̄i t̄y h̄ēn ri ke vigv̄ég m̄ū. Ū t̄y kri n̄ign̄ig k̄y n̄yt̄i ag v̄y t̄y p̄ā'i n̄yt̄i, ag t̄y v̄ēnh kar jykre tugn̄ym ke to p̄ā'i. K̄y sóg ěpr̄ā ke kuprig t̄y h̄ēn ri ke ag vigv̄ég m̄ū gé, ag t̄y ūn k̄āgt̄én ja ěn ag kuprig. Ag t̄y v̄ēnh kar m̄y Jesus k̄āmén ja tugr̄in ag tóg ag k̄āgt̄én ja n̄i, ag t̄y Topē v̄i tó tugr̄in. M̄īg ěn to ag tóg: "Topē v̄ē," he ja tū n̄igt̄i, ti k̄āgr̄ā to ke gé. M̄īg rá ěn t̄y ag tóg v̄ēnh rán ja tū n̄i gé, ag kak̄ā ki, ag n̄igé p̄ān̄i ki ke gé. Ēn ag v̄y t̄y Cristo mr̄é p̄ā'i n̄yt̄inh ha, pr̄yg t̄y mil (ke) ěn ki. ⁵V̄ēser ū ag v̄y ver r̄inr̄ir m̄ān ke tū n̄i. Pr̄yg t̄y mil (ke) ěn t̄y tū' hen k̄y ag tóg kej̄ēn r̄inr̄ir m̄ān k̄ān ke m̄ū. Ū t̄y Cristo mr̄é t̄y p̄ā'i n̄yt̄i tag ag v̄y r̄inr̄ir v̄én ke m̄ū. ⁶Ū t̄y r̄inr̄ir v̄én m̄ū m̄y tóg v̄i há han ke m̄ū, Topē ti. Topē tū v̄y t̄y ag n̄yt̄i. K̄āgter m̄ān ke tū ag tóg n̄yt̄i ha. Topē tū ki r̄ir j̄é ag tóg ke m̄ū, Cristo tū ki ke gé. Pr̄yg t̄y mil (ke) ki ag tóg t̄y p̄ā'i n̄yt̄inh m̄ū, Cristo mr̄é h̄ā.

Satanás kutē

⁷Kej̄ēn pr̄yg t̄y mil (ke) ěn tóg tū' he m̄ū. K̄y ag tóg Satanás ěn kavān s̄i han m̄ān ke m̄ū. ⁸K̄y tóg t̄i m̄ū, povo t̄y Gogue ag mr̄é Magogue ag kr̄in kónān j̄é, tátá, ga fyr tá, Satanás ti. E tāv̄i ag n̄yt̄i, goj fyr tá r̄ynhr̄yj ri ke ěn ag, goj kafā tū fyr tá r̄inhr̄ij ri ke ěn ag. Ag v̄ēnh m̄ān k̄ān han j̄é tóg ke m̄ū, Satanás ti. ⁹K̄y ag tóg tá k̄āmū m̄ū, ūn e tāv̄i ěn ag. Ū t̄y Topē ki ge k̄y n̄yt̄i ag kato ag tóg k̄āmū m̄ū, cidade ěn kato, Topē t̄y cidade to há n̄i ěn kato. Ag t̄y ag t̄y tū' he k̄ān sór v̄ē. H̄ā ra p̄i tóg kanhk̄ā tá k̄at̄ere m̄ū, k̄y tóg ag k̄āgt̄én m̄ū. Ū t̄y Topē ki ge k̄y n̄yt̄i ag t̄y tū' he sór m̄ū ěn ag k̄āgt̄én tóg m̄ū, p̄i ti. ¹⁰Japo ěn, ū t̄y ag m̄y ón m̄ū ěn fón p̄ē han ag tóg m̄ū, p̄i grug fir ěn ki, p̄i mág p̄ē ěn ki, pó t̄y enxofre p̄ur n̄ija ěn k̄āki, v̄ān p̄ur n̄ija ri ke ěn k̄āki. Goj k̄ātá m̄īg ěn v̄y tá n̄i ha, p̄i grug fir ěn k̄ākā, kar k̄y ón k̄y Topē v̄i tó t̄i ěn ti ke gé. P̄i grug fir ěn k̄āki ag tóg n̄yt̄i, tá k̄āpa m̄ān ke tū p̄ē ag tóg n̄yt̄i ha. Tá ag jagtar tāv̄i n̄yt̄i ha.

V̄ēnh kar jykre tugn̄ym ke kur̄ā

¹¹K̄y sóg n̄igja mág p̄ē v̄ég m̄ū gé, n̄igja kupri. Ū tóg kri n̄i n̄i. Ti r̄inve ga tóg tū' he m̄ū v̄āhā, kanhk̄ā ti ke gé. V̄ēnh ven m̄ān tū tóg n̄yt̄i ha, kanhk̄ā mr̄é ga ti. ¹²K̄y sóg v̄ēser kar vigv̄ég m̄ū, ūn mág ag, ūn k̄āsir ag ke gé. N̄igja kupri ěn jo ag tóg n̄yt̄i. K̄y livro v̄y tá n̄yt̄i gé. Livro ěn kygv̄āg ag tóg m̄ū. V̄ēnh kar jykre v̄y

livro ên ki ránrán k̄y n̄ȳt̄i. K̄y livro ù v̄y tá n̄i gé, ên kavãg ag tóg m̄u gé. Û t̄y r̄ir kr̄ȳg ja t̄u venh ke m̄u ag jygiy v̄y livro ên ki ránrán k̄y n̄ȳt̄i. K̄y Topê tóg v̄eser kar jykre tugn̄ym ke m̄u, k̄y tóg ag m̄y ag t̄y n̄én venh ke m̄u ti tónh ke m̄u. Ag t̄y ãjag t̄y n̄én han ja kajãm ke v̄e, ag t̄y ãjag jykre t̄y livro ki ránrán k̄y n̄ȳt̄i ên kajãm kãn ke v̄e. ¹³ Û t̄y goj ki kãgter m̄u ag v̄y tá n̄ȳt̄i gé, ù t̄y v̄eser jamã tá n̄ȳt̄i ag kar ti. V̄enh kar v̄y tá n̄ȳt̄i. Ag t̄y n̄én han m̄u kar kajãm kãn jé ag tóg ke m̄u ha. ¹⁴ K̄y ù v̄y ter mãn ke t̄u n̄i ha. Êg ter ke tag v̄y hur t̄ug. Û t̄y p̄i grug fir ên kãki vár ke tag ag v̄y kãgter ri ke han ke m̄u, k̄y tóg ag kãgter p̄e han ri ke n̄i sir, ag t̄ug p̄e han t̄u ra. ¹⁵ K̄y ùn jygi rán k̄y n̄ȳt̄i t̄u ên ag v̄y p̄i grug fir ên kãki vár kãn ke m̄u, ùn jygi t̄y Topê livro ki ránrán k̄y n̄ȳt̄i t̄u ên ag.

Kanhkã tãg mré ga tãg

21 ¹ K̄y sóg kanhkã tãg vég m̄u gé, ga tãg ke gé. Kanhkã ve ên tóg hur t̄ug, ga ve ên ke gé, goj ti ke gé. ² K̄y sóg Topê t̄y cidade tag, Jerusalém tãg tag vég m̄u gé. Kanhkã tá tóg kãtére m̄u, Topê tá, cidade tãg tag ti. Cidade s̄inv̄i han ja ag tóg n̄igt̄i, k̄y tóg ag t̄y tá v̄enh pr̄ug to festa han ke n̄i ve n̄i. Cidade s̄inv̄i tóg ùn pr̄unh ke fi s̄inv̄i ri ke n̄i, fi t̄y ã mén ke ti jãvãnh k̄y. ³ N̄igja kupri ên tá v̄enh v̄i tóg m̄e há t̄i, k̄y tóg: “Topê jamãn hã v̄e,” he m̄u. “Topê t̄y êprã ke ag mré êmãn hã v̄e,” he tóg. “Ag mré tóg n̄i n̄i ha, ti t̄u v̄y t̄y ag n̄ȳt̄inh ke m̄u ha. Topê v̄y ag mré n̄inh m̄u ha, k̄y tóg t̄y ag Topê n̄i sir. ⁴ Ag kanê var t̄y t̄u! he kãn jé tóg ke m̄u ha. Û tóg ter mãn ke t̄u p̄e n̄i ha, hã k̄y ù tóg fe kaj n̄i mãn ke t̄u n̄i gé, jagtar ke t̄um, kaganh ke t̄um. T̄ug ti n̄i ha, v̄enh jykre si kar ti. V̄enh ven mãn ke t̄u ti n̄i ha, v̄enh jykre si ti,” he tóg, v̄enh v̄i ên ti.

⁵ K̄y ù t̄y n̄igja kupri kri n̄i ên tóg: “nén (ù) kar han mãn jé sóg ke m̄u ha,” he m̄u. K̄y tóg inh m̄y: “inh v̄i tag rán n̄i,” he m̄u gé. “S̄y ki hã tó v̄e. V̄enh ven kãn jé tóg ke m̄u, s̄y ã m̄y n̄én tó m̄u tag ti,” he tóg. ⁶ K̄y tóg: “h̄y, v̄enh ven kãn ti huri,” he m̄u gé. “Ùn ve v̄y t̄y inh n̄i, k̄y sóg t̄y êgno n̄i gé. Is̄y n̄én (ù) kar han to hã sóg n̄i n̄i, k̄y sóg n̄én (ù) kar t̄ug m̄u ra n̄inh m̄u gé. Û tóg goj kron sór m̄u. Ên m̄y sóg goj ven t̄i, kaja t̄u ra. Is̄y ti m̄y goj ven m̄u ên v̄y ti ter t̄u han ke m̄u. ⁷ Û t̄y isovãnh t̄u ên m̄y sóg n̄im ke m̄u, presente tag ti, ha m̄e: ti Topê v̄y t̄y inh n̄inh m̄u, k̄y tóg t̄y inh kósin n̄inh m̄u gé,” he tóg inh m̄y, ù t̄y n̄igja kupri kri n̄i ên ti.

⁸ Hã ra ù ag tóg p̄i grug fir kãki, p̄i mág p̄e ên kãki vár ke m̄u, hã v̄y: ùn m̄umêg (ka)mê ag, he m̄u, ù t̄y isovãnh m̄u ag, he m̄u, ù t̄y v̄enh jykre pãno t̄y v̄enh kavênh t̄i ag, he m̄u, ù t̄y ù tén t̄i ag, he m̄u, ù t̄y ã pr̄u t̄u fag mré n̄ygn̄y m̄u ag, he m̄u, ù t̄y ã mén t̄u mré n̄ygn̄y m̄u fag, he m̄u, kujã ag, he m̄u, curandeiro ag, he m̄u, ù t̄y v̄enh kãggrã jykre m̄i m̄u m̄u ag, he m̄u, ùn ón m̄u ag, he m̄u gé. P̄i grug fir ên kãki tóg ag vãm kãn ke m̄u, pó t̄y enxofre p̄ur n̄ija ên kãki, vãn p̄ur n̄ija ri ke ên kãki. K̄y tóg ag kãgtén p̄e han ri ke n̄i sir,” he tóg, ù t̄y n̄igja kupri kri n̄i ên ti.

Jerusalém tåg

⁹Kỹ Topě tỹ jěně jafã ù tóg inh ki jun mũ, ù tỹ pěnky kākã nĩ ěn tỹ ga kri ke ag vóg kónãn mũ ěn ag kã ù. Inh mỹ tóg: “kunĩg,” he mũ. “Cordeiro prũnh ke fi venh kãtĩg,” he tóg inh mỹ.

¹⁰Kỹ Topě kuprĩg tóg inh krĩn mũ sir, kỹ sóg nén nẽ vэг mũ. Topě tỹ jěně jafã ěn tóg inh pére tĩ mũ, pãnónh těj (gy) kri. Pãnónh kri jě kỹ tóg inh mỹ Topě tỹ cidade tåg ven mũ sir, cidade tỹ Jerusalém, he mũ tag ti, ù tỹ kanhkã tá kãtere mũ tag ti, Topě tá. ¹¹Sĩnvĩ pẽ tóg nĩ, Topě sĩnvĩ ěn ri ke ti nĩ, kókov tóg nĩ gé, pó tỹ jaspe kókov ri ke. Pó tỹ tonh vỹ tỹ ti nĩ, jaspe ti, kỹ tóg pó kókov fin ěváj ěn ri ke nĩ. ¹²Cidade jy ró tóg těj gy nỹ, vènh ra hã tóg těj gy jě gé. Ró ki jãnkã tỹ 12 (ke) vỹ nỹtĩ. Kỹ Topě tỹ jěgně jafã tỹ 12 (ke) ag vỹ ki rĩr nỹtĩ, jãnkã ki. Ki vènh jygjy tóg rãnrán kỹ nỹtĩ, jãnkã ki, Israel jógjóg ve tỹ 12 (ke) ěn ag jygji ti. ¹³Rã jur ja kãtã tóg jãnkã tãgtũ nĩ. Rã pur ja kãtã tóg jãnkã tãgtũ ù nĩ gé, kanhkã tãpér kãtã tóg jãnkã tãgtũ ù nĩ gé, kanhkã tãpér ù kãtã tóg jãnkã tãgtũ ù nĩ gé. ¹⁴Pó tỹ 12 (ke) kri tóg hyn han kỹ nĩ nĩ, cidade ti. Pó ěn ki vènh jygjy tóg rãnrán kỹ nỹtĩ gé, apóstolo tỹ 12 (ke) ěn ag jygji ti, cordeiro tũ ěn ag jygjy ti.

¹⁵Kỹ ù tỹ inh mré vĩ mũ ěn, Topě tỹ jěně jafã ěn tóg ti kãmun jafã vyn kỹ jě nĩ, ti kãmun jafã tỹ ouro ti. Kỹ tóg cidade kãmun sór mũ, cidade jy ró ti, ti jãnkã ti ke gé. ¹⁶Péno tỹ 4 (ke) ti nĩ, cidade ti, kỹ ti tãpér vỹ ti těj ri ke nĩ. Kỹ Topě tỹ jěně jafã ěn vỹ kãmun mũ sir, cidade ti, ti kãmun jafã tỹ. Quilômetro tỹ 2 mil kri 200 (ke) ti nĩ, ti tỹ těj e kỹ nỹ ki, ti tãpér ki ke gé, ti tỹ vènh ra jěn ke gé. Vènh ri ke kar ti nĩ, ti kãmur ti. ¹⁷Kỹ tóg cidade jy ró ěn kãmun mũ gé. Ti tãpér vỹ metro tỹ 64 (ke) nĩ. Metro tag vỹ tỹ ěprã ke ag kãmun jafã nĩ, hã ra Topě tỹ jěně jafã vỹ kãmun mũ, ěprã ke ag kãmun jafã tỹ. ¹⁸Ró vỹ pó tỹ tonh tỹ jaspe tỹ han kỹ nỹ. Kỹ cidade vỹ ouro tỹ han kỹ nĩ, hã ra tóg fin ěváj nĩ, vidro fin ěváj ri ke. ¹⁹Cidade jy ró tóg pó tỹ tonh mág kri han kỹ nĩ. Pó ěn to pó tỹ tonh ù tóg nỹtĩ gé, ùn e ag. Pó tỹ tonh mág ù tóg tỹ jaspe nĩ, kỹ ù tóg tỹ safira nĩ, kỹ ù tóg tỹ ágata nĩ, jo ù tóg tỹ esmeralda nĩ, ²⁰jo ù tóg tỹ sardônio nĩ, jo ù tóg tỹ sárdio nĩ, ù tóg tỹ crisólito nĩ, ù tóg tỹ berilo nĩ, ù tóg tỹ topázio nĩ, ù tóg tỹ crisópraso nĩ, ù tóg tỹ jacinto nĩ, ù tóg tỹ ametista nĩ gé. 12 (ke) ti nỹtĩ, pó mág ti. ²¹Kỹ ti jãnkã tỹ 12 (ke) vỹ pérola tỹ hyn han kỹ nỹtĩ. Jãnkã pir vỹ pérola pir nĩ mỹr, ha mẽ. Kỹ ěpy mág ěn, ěmĩn mág ěn vỹ ouro tỹ han kỹ sa, hã ra tóg fin ěváj nĩ, vidro fin ěváj ri ke.

²²Hã ra sóg Topě jo ĩn vэг tũ nĩ, cidade ěn tá. Topě vỹ vènh kar kri nĩ, kỹ tóg nén (ũ) kar han ki kanhró nĩ gé. Topě hã vỹ cidade ěn tá ěmã nĩ, cordeiro ti ke gé, hã kỹ tóg tá ag jo ĩn tũ nĩ. ²³Kỹ rã tóg tá tũ nĩ gé, kysã ke gé. Topě tỹ jěngrě vỹ ki kurã han tĩ, kỹ tóg tá kutyg vãnh nĩ sir. Cordeiro ěn vỹ cidade ěn tá rã ri ke nĩ. ²⁴Kỹ vènh kar tóg Topě tỹ cidade ki jěngrěg ěn tugrĩn ěvãnh há han tĩ, povo kar ag. ěprã pãlĩ kar ag vỹ ajag tỹ nén (ũ) kar gé kãmũnh mũ, ag tỹ tá vin han jé. ²⁵Jãnkã vỹ nugnón kỹ nỹtĩ, kurã kar ki. Kutyg tũ nĩn kỹ ag tóg jãnkã nĩgfěnh tũ nĩgtĩ. ²⁶Povo kar ag vỹ ajag tỹ nén (ũ) gé kãmũnh ke mũ, cidade ěn mũ. ²⁷Hã ra nén ù kórég vỹ kãrãnh ke tũ pẽ nĩ. Û tỹ vènh jykre pãno han mũ ag vỹ rã genh ke tũ nĩ,

ũn ón mũ ag ke gé. Ũn jygi tỹ livro ki ránrán kỹ nỹtĩ ên ag hã vỹ ra genh ke mũ. Ũ tỹ rĩr krỹg ja tũ vég mũ ên ag jygy vỹ ránrán kỹ nỹtĩ, cordeiro tỹ livro ên ki.

22 ¹Kỹ Topẽ tỹ jẽnẽ jafã tóg inh mỹ goj mág ven mũ. Goj ên vỹ ẽg rĩnrĩr han tí. Kómkóm ke ti tĩ, goj ên ti, pó kupri fin ẽváj tỹ kómkóm ke ên ri ke, goj ti. Goj ên nĩhỹg vỹ Topẽ nĩgja tá nĩ, cordeiro nĩgja ên tá. ²Kỹ tóg cidade kuju mĩ ti mũ, ẽpry mág jagma, ẽmĩn mág ên jagma, goj ti. Ti fyr tá ka tóg nỹtĩ, ti fyr ũ tá ke gé. Ka kanẽ ên vỹ ẽg rĩnrĩr han tí gé. Ên vỹ prỹg pir ki kanẽ tỹ 12 (ke) han tí. Kysã kar ki tóg ã kanẽ hyn han tí. Ti fėj vỹ tỹ vẽnh kagta kar nĩ, vẽnh kaga kar tỹ tóg hághá' he kãn tí. ³Topẽ tỹ nén ũ to jũ vỹ tá nĩnh ke tũ pẽ nĩ, cidade ên tá.

Topẽ nĩgja vỹ cidade ên tá nĩ nĩ, cordeiro nĩgja ên tí, kỹ vẽnh kar vỹ ti to: “Topẽ vẽ,” henh ke mũ, Topẽ rãnrãj han tí ag kar. ⁴Topẽ ve jé ag tóg ke mũ, kỹ ti jiji vỹ ag kakã ki rán kỹ nĩnh mũ. ⁵Tã tóg kutyg vãnħ nỹgtĩ, hã kỹ ag tóg tá lampião grug ke tũ nĩ. Rã vỹ tá tũ nĩ gé. Topẽ vỹ ag mỹ tỹ jẽngrẽ han tĩgtĩ, ẽg pã'i ti. Kỹ tá nỹtĩ ag tóg tỹ pã'i nỹtĩnh ke mũ gé. Ag tỹ tỹ pã'i nỹtĩnh ke tag vỹ tũ' henh ke tũ nĩ.

Jesus kãtĩg mãn

⁶Kỹ Topẽ tỹ jẽnẽ jafã ên tóg inh mỹ: “inh vĩ vỹ tỹ ki hã ke nĩ,” he mũ. “Vẽnħ ó pijé,” he tóg. “Êg jóg tỹ Topẽ vỹ ũ tỹ ã vĩ tó tĩ ag mỹ ã kuprĩg jẽnẽ, ti tỹ ag kanhrãn jé. Hã kỹ tóg ã tỹ jẽnẽ jafã ag kã ũ jẽnẽ, ti tỹ ti mỹ rãnrãj tí ag mỹ tó jé, nén tỹ kãnhmar kutẽnħ ke mũ ti,” he tóg, inh mỹ, Topẽ tỹ jẽnẽ jafã ti.

⁷Jesus vỹ tag tó mũ, ha mẽ. “Ha vé, inh kãtĩg mãn ke nẽ ha. Nén tỹ livro tag ki rán kỹ nĩ tag to jykrãn há han nĩ, kỹ Topẽ tóg ajag mỹ vĩ há han ke mũ,” he tóg, Jesus ti.

⁸Tag kar ve inh, mẽ inh ke gé, inh, hã vỹ: João, he mũ. Isỹ ve kãn kar kỹ sóg ũ tỹ inh mỹ tag ven mũ ên krẽm mũg ke mũ, sỹ ti mỹ: “Topẽ vỹ tỹ ã nĩ,” he jé. ⁹Hã ra tóg inh mỹ: “ke tũg nĩ,” he mũ. “Á ri ke sóg nĩ, isỹ Topẽ rãnrãj han kỹ. Á régre ag ri ke sóg nĩ, ũ tỹ Topẽ vĩ tó tĩ ag ri ke sóg nĩ, ũ tỹ livro tag ki nén rán kỹ nĩ mẽg mũ ag ri ke sóg nĩ gé. Topẽ hã mỹ: “Topẽ vỹ tỹ ã nĩ,” hemnĩ,” he tóg, inh mỹ, Topẽ tỹ jẽnẽ jafã ti.

¹⁰Kỹ Jesus vỹ tag tó mũ gé, ha mẽ. “Livro tag ki nén rán kỹ nĩ tag pēju sór tũg nĩ,” he tóg, inh mỹ. “Kakó ti nĩ ha, ajag tỹ nén tỹ ki rán kỹ nĩ tag venh ke mũ ti. ¹¹Ũ tỹ vẽnħ jykre pãno han mũ ên jé han kỹ nĩ nĩ. Ũ mỹn hỹn há tĩgtĩ, ti jykre kavėj ti. Ti jé ã jykre kórég hã mĩ tĩg. Ũ tóg vẽnħ jykre kuryj han tí. Ti jé to tar nĩ. Ũ ag tóg tỹ Topẽ tũ nỹtĩ. Ag jé ti to krónħ ke tũg,” he tóg, Jesus ti.

¹²“Ha vé, inh kãtĩg mãn ke nẽ ha. Ajag kaja ma sóg kãtĩg ke mũ, ha vemnĩ. Vẽnħ kar vỹ ve kãn ke mũ, ag tỹ nén han mũ kaja ti. ¹³Topẽ vĩ kar han sóg tí. Ũn ve vỹ tỹ inh nĩ, ũn tỹ ẽgno vỹ tỹ inh nĩ gé. Isỹ nén kar han vén to hã sóg nĩ, kỹ sóg nén kar tỹ tũ' he mũ ra ẽgno kã nĩnh ke mũ gé,” he tóg, Jesus ti.

¹⁴“Ũ ag tóg ajag jykre kugrynh sór tĩ, hã kỹ ag tóg ẽg tỹ ẽg kur kygfã ri ke han tí. Ên ag mỹ tóg vĩ há han ke mũ, Topẽ ti. Ka kanẽ tỹ ẽg rĩnrĩr han tí ên ko jé ag tóg ke mũ, kỹ ag tóg cidade ên jãnkã ra genh ke mũ gé. ¹⁵Hã ra ũ ag tóg ên ra genh ke tũ nĩ, hã vỹ: ũ tỹ vẽnħ jykre pãno tỹ vẽnħ kavẽnħ tí ag, he mũ, kujá

ag, he mũ, curandeiro ag, he mũ, ù tỹ ã prũ tũ fag mré nỹgnỹ mũ ag, he mũ, ù fag tỹ ãjag mén tũ ag mré nỹgnỹ mũ fag, he mũ, ù tỹ ù tén mũ ag, he mũ, ù tỹ vènh kãggrã jykre mũ mũ mũ ag, he mũ, ùn ón mũ ag, he mũ, ù tỹ ù ag lograr he mũ ag, he mũ gé. Ën ag vỹ cidade ra genh ke tũ pẽ nĩ,” he tóg, Jesus ti.

16 “Isỹ jẽnẽ jafã jẽnẽ inh, inh, hã vỹ: Jesus, he mũ. Ti jẽnẽ inh, ti tỹ ãjag mỹ ãjag tỹ nén venh ke mũ kar tó jé, ù tỹ inh vỹ jẽmẽ jé vènh mãn tĩ ag kar mỹ. Davi krẽ!krẽ ag kã ù ãn vỹ tỹ inh nĩ. Krĩg mág hã sóg nĩ,” he tóg, Jesus ti.

17 Kỹ Topẽ kuprĩg vỹ Jesus mỹ: “kur kãtĩg,” he mũ. ù tỹ ti ki ge kỹ nỹtĩ kar ag vỹ ti mỹ tag tó tĩ gé, ag tỹ tỹ ti prũnh ke fi ri ke nỹtĩn kỹ. ù tỹ ag tỹ ti jé prẽr mæg mũ ag jé ti mỹ: “kur kãtĩg,” he kãn.

Kỹ Jesus tóg: “ù tỹ goj kron sór mũ ãn jé iso kãtĩ,” he mũ, “sỹ ti mỹ goj jun jé, fagrĩnh mỹ. Goj ãn vỹ ti rĩr han ke mũ, ha vemnĩ,” he tóg, Jesus ti.

João tỹ ve ja

18 Vãhã sóg tag tó sór mũ, inh, hã vỹ: João, he mũ, ha mẽ. ù tóg kejẽn isỹ nén rán mũ tag ve kỹ pãte ù rán mãn sór ke mũ gé hèn ri ke mũn. Ën vóg kónãn tãvĩ han jé tóg ke mũ, Topẽ ti, kỹ tóg sỹ nén ù jagy tó mũ ãn ve kãn ke mũ, ha mẽ.

19 Kejẽn ù tóg hèn ri ke mũn isỹ nén rán mũ ù tỹ nén ù tũ han sór mũ. Ën tũ mág tỹ tóg tũ! henh ke mũ gé, Topẽ ti, kỹ tóg ka kanẽ tỹ ãg rĩnrĩr han mũ ãn konh ke tũ nĩ. Topẽ tỹ cidade nĩv ãn ra rãnh ke tũ tóg nĩ gé, sỹ cidade kãmén mũ ãn ra.

20 ù tỹ inh mỹ tag kar ven mũ ãn vỹ: “inh kãtĩg mãn ke nẽ ha, sỹ ki hã tó vẽ,” he mũ.

Hỹ, kur kãtĩg, ãg Senhor tỹ Jesus'.

21 Ëg Senhor tỹ Jesus jé ãjag kar tar han. Hã vẽ.

Ëg tỹ Topẽ vỹ rá venh ke

Ëg tỹ Topẽ vỹ rá ve kỹ ki kanhrãn kỹ ki krov kỹ ãg hã han ke mũ. Kurã kar ki ãg tóg to sĩ han ke mũ, kỹ ãg tóg kãnhmar fĩn rãm ke mũ. Kỹ tóg há tĩ gé, ãg tỹ prỹg kar ki Novo Testamento tag fĩn rãm kỹ, ãg tỹ tỹ vènh kanhrãn há han jé. Ëg tỹ fĩn rãm jé ãg tóg gen kỹ to kenh mũ, ha vé: